

繡餘草題詞

余頃過安亭宿震川書院詢及先生後人無知者或云常熟女史歸氏佩珊即其裔也佩珊名懋儀為上舍李學璜之室以詩名數十年窮老且病吟咏不輟間為人延請教閨秀皆井井有法度所著繡餘草聽雪詞皆有刻本茲所見繡餘近草其續著也余惟婦德不出閨門詩非所急然古女子皆嫻詩如關雎雞鳴等篇皆出於宮人之手而葛覃之章則后妃所自作其詩曰言告師氏知古女子皆有師長而猶敬禮焉漢唐以來如曹大家宋若憲姊妹皆以博學多聞為女子師然則歸氏之

以其學教授於閨閣方之於古為有徵矣近日閨秀如蒙城張參戎之女襄號雲裳者其父與夫家與余皆有香火緣襄天才亮拔有聲吳下參戎病時割股和藥以進長適湯公子為時名雋閨門之內若金玉計所遇有勝於佩珊者然佩珊得名尤早其詩則先後勁未易瑜亮也昔人云觀名賢之功烈慨然思識其子孫吾訪震川先生子孫未獲而得悉其後有才女亦足慰榛苓之思也爰灑筆而為之序道光戊子花朝安化陶澍

往予聞笠澤顧劍峯廣文西江吳蘭雪中翰論詩往往稱海上歸佩珊女士兩君者皆以詩名當代矜慎不妄許譽獨於女士詩不去口道光乙酉秋出守雲間其冬以海運至滄瀆潘梧亭觀察許榕皋大令復嘖嘖言女士詩時方課士敬業書院李君復軒適以文字相賞過從歡甚於是始得盡讀女士所作間有篇詠輒辱賡和名章俊句凌紙煥發復軒之文如幽燕老將氣韻沈鬱傑然為東南名宿女士則天才拔張蕭蕭跨俗襟靈颯發筆舌爭妙所居蘆簾紙閣白首相對簞瓢捽茹有以自樂而著作爛然蓋不知黼黻之足榮而金犀之為貴也予惟前明范參議允臨偕其夫人徐淑山居倡和稱艷一時董文敏為題詩畫圖所謂鹿門不獨偕龐隱彤

管還聞續楚詞者也而趙凡夫娶陸師道女卿子則又
才藻相高夫婦同隱至今擘牋瘁墨若瑒琳然復軒母
楊恭人以能詩著錄邑乘今女士繼之是尤足見承平
士大夫家禮義陶淑之久詩書浸灌之深房教矢音無
忝風雅後之視今猶今之視昔蓋必傳無疑也戊子初
夏解監司篆將還吳門爰書以為別鄂渚陳鑿芝楣甫
書

道光十年小春十日重禧讀於雲間舟
次時將訪上楣觀山於虞山

繡餘餘草

琴川佩珊歸懋儀

蠟梅

誰將花骨鑄黃金
破蠟窗前伴瘦吟
我有牢愁不能吐
與君相對話同心
檀心磬口沒鶯黃
不學江妃時世妝
相對不禁珍惜甚
一般清瘦歷冰霜
錢幹槎枒劇老蒼
冰心玉貌帶微黃
此花品格超凡俗
不稱時妝稱道裝

一種孤芳不嫁林
蠟丸封固待知音
白衣蒼狗隨時幻

羨爾年年抱素心

靜中別有妙香聞
沈水何須竟體薰
紙帳夜涼來冉冉
浚黃衫子墨綉裙

數朶橫斜傍玉臺
嶺梅消息未傳來
知君怕領凡桃李
故向年光盡處開

庚辰九日次三松老人韻

陽春一曲調偏高
落帽風前氣自豪
入社又開新壁壘
尋山已換舊宮袍
舊客至還題句送
酒人來又餽糕
愧我推敲吟未穩
蕭蕭短鬢不勝搔

縣車翰墨當生涯
安樂窩中歲月賒
陶尹清尊酬令節
魏公晚圃放秋花
蒼茫雲水游蹤遠
稠疊詩篇寄興遐
採得茱萸成薄醉
一枝笑挿帽簷斜

秋日感懷仍用前韻

風急遙天雁陣高
吟情頓減昔年豪
三秋遠塞傳哀詔
一夕嚴霜點素袍
旅客歸期成畫餅
故園令節又題糕
新詩三復添幽興
似倩麻姑仙甲搔
茫茫塵事正無涯
問水尋山願尚賒
此日又嘗新漉酒
幾時得見故園花
良辰一瞬流光速
靈夢三生涉想遐
惻惻輕寒欺病骨
西風簾捲夕陽斜

吟入商風調易高
管花凋盡興難豪
荒庭夜月聞清杵

殘漏秋鐙補散祀示疾維摩還斷酒持齋蘇晉且嘗糕
年來無復登臨意咄咄書空首漫搔

海天愁思渺無涯雲樹蒼茫入望賒幾卷殘書聊遣日
一庭蔓草併無花月明近砌蟲聲急鐙暗深幃蝶夢遐
一自病餘成嬾散秋衾慵理髻歌斜

題錢端谷居士畫蘭

一枝管米奪天工貌出湘皋屈宋風淡到無言心自會
真香原在有無中

爲楊七舅母作次三松老人韻

梵音微度佛龕深甘露常霑祇樹林雁度重雲雲度水

本來無相亦無心

題顧母富太孺人遺照

述祖難忘大母恩披圖警效儼然存青鐙白髮霜幃裏
課子成時又課孫

辛勤十指送華年紡績聲和刀剪連親飽肥甘兒飽學
寸心終可慰重泉

宋母張太孺人輓詩

嗣君流炳孝廉需次令尹

傷心早誓柏舟篇食蓼茹荼五十年痛過瀧岡阡一表
佳兒賢母並時傳

高懷曾不計窮通淑氣常周一室中生長清門崇禮法

閨中原有大儒風

幻泡功名是禍胎青年玉樹掩蒼苔傷心一曲明妃詠
清夜招魂誦幾回

泣血聲連刀剪聲烏啼月落夜三更娛親課子心頭事
九死還教賸一生

子舍承歡進壽卮板輿捧出日遲遲冰霜歷盡陽和轉
看到蘭芬桂馥時

七寶池開千葉蓮一生來去總超然彌留拈出菩提諦
遺訓還教啟後賢

雨窻

擬將枯管寫牢騷目眩燈昏意憊勞正苦欲眠眠不得
西風一雁叫平皋
欲覓華胥一枕安幽懷應得暫時寬昨宵夢醒追前事
觸起新愁又幾端

吳門寄懷淑齋師海上

陰晴易寒暑眠食近何如海國涼生早吳江楓落初消
愁調小鳳遣興托鼓書更喜薜花放宮袍捧綵輿
人生知己重閨閣賞音難度出金針細量來玉尺寬看
花常富貴指竹頌平安幸托喬松蔭相依共歲寒
客中逢令節顧影共徘徊畫閣三秋別黃花兩度開春

風原浩蕩小草感栽培夢裏尋鄉路時還拜玉臺

代簡寄定菴居士吉雲夫人

公子金閨彥英年泛斗槎艷才驚古佛妙想托蓮花清
極醒無寐愁來氣吐霞衣冠偏質樸胸次絕紛華
仙舟來往數幾度接清塵蓬梗偏憐我春風每及人襟
懷原浩蕩設笑見經綸此日名山業書成早等身
舉案人如玉幽閒蘭蕙姿柔毫書瀚紙纖月寫蛾眉善
慰高堂意能將中饋持三生脩福慧雙毓鳳麟兒

客中雨夜無寐寄小韞

又是吳江楓落天擁衾聽雨不成眠暮年作客原非計

末路求名亦可憐

外子猶復
俛首帖括

遙夜鄉心易振觸入秋衰

病倍纏綿知卿亦抱幽憂疾終歲叢殘手自編

吳宮

羅綺銷為瓦礫叢鷓鴣聲裏霸圖空祇應惟有東門日
炯炯清光照故宮

又是梧宮葉落時興亡轉眼劇堪悲美人巧笑孤臣泣
試問君王屬意誰

七姬祠

七姬同志更同棲報主心難舉室齊指點當年埋玉地
一群杜宇隔花啼

三高祠

治吳廿載張歸逢
敝蹤功名笑脫時
自愛五湖風月好
閒情端不屬蛾眉

京洛緇塵染素襟
尊香鱸美觸歸心
秋風落日推蓬看
晚網魚游江水深

門鴨欄邊放釣船
一生夢不到釣天
唱酬更有皮從事
收得茶租當酒錢

又咏范少伯

一棹扁舟泛五湖
黃金鑄相亦饜餬
烟蓑雨笠秋江上
誰識當年范大夫

梅

冰綃新製五銖衣
倚竹娟娟瘦不肥
買到春光珠覺賤
照來香影月增輝
人行曲岸雙扉掩
雪霽深林一鶴歸
曾向孤山訪遺跡
前塵如夢是耶非

東風一夜度關津
瞥覩明珠照眼新
瘦影臨波添韻致
斜枝入畫最丰神
歲寒久盼傳芳信
道遠何由贈美人
生與此花同臭味
羅浮仙蝶或前身

蘭

香韻花中莫比倫
滋培風露幾經春
生從空谷原初志
偶植當門亦夙因
名重楚詞偏寫怨
祥徵姑夢竟通神

不言幽意無人會靜對湘波自寫真

竹

青鸞尾翠綠雲涼新粉飄殘實又芳直節早看凌碧漢
虛心偏是耐清霜堪為伴侶惟松柏到此栖遲只鳳凰
最是好風良月夜半天幽韻曼宮商

菊

寒香幾陣撲窓紗開到陶家得意花秋士風神清有骨
伊人顏色玉無瑕能禁霜重枝偏瘦縱受風多影不斜
未必有心真傲世從來逸客遠紛華

杏

閒關好鳥送佳音嫩日烘開色淺深十里艷迷游子騎
一枝紅映美人襟青帘低拂霏香雨烏帽斜簷醉上林
幾度買花前巷過玉樓春睡尚沈沈

繡球

丰姿原不受塵埋合掛玲瓏白玉釵拋去依然珠在掌
捧來渾似月投懷化工洗滌春風淨寶相圓明仙露揩
素手擎來還一笑團圞佳讖贈同儕

白牡丹

冰綃初試玉肌涼小立芳釵夜有光不御鉛華真國色
獨標高格是花王飛來瑤島春無跡舞到霓裳月亦香

卻笑江梅太清瘦替他姑射助新妝

春暮偶成

峭寒踈雨徧清明九十韶華幾日晴啼鴉聲中尋舊夢
落花風裏悟三生珠光一任融成水蜃氣從他幻作城
波面浮萍簾外絮輸他解脫去來輕

青鐙影裏獨長嗟景物炎涼換歲華蒲種愁心抱明月
滿庭香雪莖梅花情天許補三生過法界難容一線差
彈罷瑤琴魂欲斷白雲芳草思無涯

寄琴川李湘娟同學

渺渺相思寄綠波璇閨眠食近如何人當離別情懷惡

節近清明風雨多卿要達觀參水月我因衰病戀巖阿
榮枯一瞬尋常事贏得芳名永不磨

題仕女圖寄楚中岫雲女士

劉杏垞明經女公子也

曉妝慵不整羅襟吹滿香風月館深半晌攀條嬌不語
問卿底事費沉吟

劉杏垞明經楚中貽詩次韻

萍跡蘇臺幾度春愁中花月病中身彩雲忽向天邊墮
往事重提倍愴神

居傍滄浪興倍豪天風海水送雲璈掌珠早下溫家鏡
射雀人驚燦鳳毛

無珠可賣但牽蘿又逐萍飄大海波爭羨謝娘饒福慧
吟成白雪妙如何

寄題武昌小滄浪館四絕

小滄浪館勝蓬萊四面波光擁月來曲好不須愁和寡
高吟正對伯牙臺

青邱詩格匹梅花仙吏同乘湖上槎白紵烏紗塵外賞
一時騶唱靜無譁

筆床茶竈此句留有客高吟獨倚樓坐擁青山圖畫裏
風流誰得似隨州

月湖風月四時新多少名流競問津吳苑滄浪荒廢久

臨流應待濯纓人

次杏垞題小滄浪亭七律原韻

三千里路往仍還昨夜明明夢度關好景有緣容我到
浮生若夢幾人閒濯纓濯足樓前水宜笑宜顰湖上山
指點名流觴咏地萬重雲水屋中間

從來名士半林邱終古神仙住十洲兩岸菰蒲雲作障
四圍烟水屋如舟月明鷺鶴齊聽曲風起蛟龍欲上樓
浮世紅塵飛不到一竿漁唱萬山幽

病中口占有贈

飄蓬茂苑久棲遲幾度秋風換鬢絲歸棹急偏衝暮雨

還山病又過花時三生要證菩提果九死難忘文字知
難得萍蹤風裏聚草堂尊酒待論詩

定菴過訪談詩見贈次韻二律

翩翩公子過夷門雪比聰明玉比溫脩到優曇原慧果
種成仙杏本靈根水中見月曾無跡鏡裏看花不著痕
歸去草堂重煮茗歲寒心事共評論
風風雨雨掩重門香燼薰爐火不溫幻夢幾時登覺所
多生未免種愁根刪除蓋篋閒詩稿湔洗春衫舊淚痕
絮泊蓬飄成底事客中情緒不堪論

王烈女詩

靚面偏無比翼緣入門先受舅姑憐嚴霜一夕摧連理
斷送芳華十七年
澣卻麻衣血液斑見人猶是掩羞顏羨他荆布田家女
一死居然重泰山

題枝園感舊圖

淑齋師與其姪女錢夫人論詩感舊夫人錢謝菴吏部室也

枝園小葺傍蘇臺高臥東山別墅開爭羨謝庭多樂事
一門詠絮擅雙才

佳耦分曹著政聲看花先後到蓬瀛當時京洛聯吟地
閨閣爭傳二阮名

天香吹滿月輪圓話舊重聯骨肉緣最喜椿萱同鬢鑠

雙斟春酒祝長年

十年姑姪悵離群宦迹真同水面雲
話到鴻泥頻感觸論詩煮茗坐宵分

高年離合最關心想見揮毫寄意深
今日披圖倍惆悵數行遺墨重兼金

聯吟同坐散花天此會千秋豈偶然
悵我緣慳遲識面未曾雙拜繡帷前

讀七姬碑誌題後

美人至性自天成大義明時生死輕
試把瑤琴彈一曲條條都作斷腸聲

觀局從知心早仄臨危何事更遲回
同心姊妹同時死底用檀奴著意催

題再生緣傳奇

合歡花向筆端開雅調新翻出玉臺
世上良緣多缺陷補天煞費女媧才

緣淺緣深喚奈何愛河底事起驚波
鏡分鸞影終湏合紅葉傳情事豈訛

手種三千桃李花蛾眉簪筆草黃麻
量來玉尺精嚴甚儘許檀奴拜絳紗

搗毫春殿擁仙班貌出觀音水月顏
不是玉容沈醉後

肯教容易露機關

巾幗叢中第一流
鬚眉合讓女班頭
不貪富貴天家樂
到底闌畦遂好逑

再生緣竟結今生好
訂三生金石盟
月自團圓花並蒂
人間安得盡如卿

詠螢和韻

混入星光沒良宵
亦慰情傍林無遠
照依草感微生
天迴明河直庭空
素練橫飄零無定所
暗逐歲華更
高下光零亂
偏能動客情
照人無定境
念爾亦勞生
焰少字難辨
燈昏經尚橫
似愁節序改
宛轉戀殘更

贈嚴太君

令子叔山為海上少尹

露桃花下拜仙容
話到情親比酒濃
萍水有緣葭倚玉
同庚同調又同宗

玉骨珊珊雅澁粧
神仙風度佛心腸
傾襟大有鬚眉氣
巾幗人間未許方

吳淞千里快通津
濬導年來政蹟新
共賴長才籌水利
欣看驥子展經綸

日麗風和景最妍
板輿捧出萬花前
三牲底用供甘旨
封鮓高風仰母賢

承歡佳婦善操持
堂北同斟介壽卮
更喜文孫頭角好

亭亭蘭玉秀雙枝

爭羨金閨福慧齊
花冠繡帔燦雲霓
添將蔗境風光好
稠疊

天書拜紫泥

為江韜庵明經題蓮花小影

彼岸分明指回頭
路不賒禪心證秋水
寶相現蓮花東
海聊為客西方
別有家塵勞應念我碌碌送年華
三教原歸一名儒
半佛門借花憑寫照
觀月不留痕
波泊全天性
文章本宿根
浮雲多幻境
萬古此心存

題明妃出塞圖

圖畫無端誤醜媒
長門風雨長青苔
翻因瀚海無期別
博得君王一顧來

獨抱琵琶出雁門
馬頭斜月又黃昏
玉顏拚為風沙悴
未得承恩且報恩

不藏金屋走交河
命薄緣慳喚奈何
一點丹忱化青塚
美人從古熱腸多

寒透豐貂馬不停
玉顏光照塞山青
琵琶聲裏如霜月
少个知音此際聽

馬蹄一去幾時還
千仞孤城萬疊山
若使阿儂生並世
不辭相送到陽關

滾滾征塵撲繡鞍披圖我亦發長歎閉門歷盡羊腸路
塞北江南總一般

秋花次韻

花到秋花耐久看看花每怯越羅單半窓疎影蟲聲冷
一笛高樓月色寒香徑客來泥爪換西風簾捲鬢絲殘
銀塘幾陣瀟瀟雨滴碎愁心入夢難

秋河次韻

一泓清淺衆星羅悵望遙空秋思多是處幾人來問瘦
羨他終古不生波獨憐牛女經年別多事天公設此河
鵲駕未成仙鯉香迢迢良夜奈愁何

題畫

連朝細雨濕香泥紅鬧枝頭入望迷為報玉樓人未起
翠禽休傍綺窓啼

美人風箏

不是踰躑掌上身珊珊仙骨怕沾塵從知世上無金屋
只好天邊寄玉人力弱要憑風作主情深祇與月為隣
丹青浩蕩蓬山遠好證三生未了因

七夕次閨友韻

銀河清淺不生波又送天孫夜渡河畢竟佳期天上準
人間良會易蹉跎

頃刻悲歡夢未成
天雞絕唱曙星明
那堪一曲銀河水
萬古離愁洗不清

銀漢迢迢繡幄開
穿針熬費謝娘才
天孫已被聰明誤
肯向人間送巧來

歲暮訪怡園次壁間韻贈怡庵主人

飄蓬兩度值殘年
鴻爪還尋六載前
新婦惠貽機上錦
阿翁分贈杖頭錢
詩逢勅敵難成句
骨為嚴寒屢聳肩
明歲準隨新燕到
相期同醉杏花天

用前韻贈玉芬夫人

相思歲歲復年年
半在花前半月前
顧影尋詩誰作伴
療愁買醉不論錢
清虛洞府原無耦
辛苦齏鹽獨自肩
提甕曉行深雪裏
冰心耐得峭寒天

石門道中

征途偷得幾朝閒
小艇夷猶雲水灣
生怕峭寒侵病骨
蓬窓擁被看青山
密密編籬短築牆
野梅零落賸餘香
從知儉樸鄉風好
不種垂楊只種桑

落日平原野雀哀
江梅絕謝野棠開
森森松柏誰家墓
華表長留鶴不來

天光雲影照人明
終近西湖水便清
日日扁舟橋下過

橋多偏不記橋名

斷續茅茨傍水邊濛濛幾處起炊烟日斜湖上歸來晚
半啟柴門泊釣船

莫悵回風引棹遲天教細讀書中詩雲籠峯頂成竒態
樹近溪坳多好枝

輓祝簡田先生 時同人詠雪即用文字韻

碧紗曉起噪晴鴉長記初停問字車青眼照人如坐月
白頭扶杖共看花升天靈運先成佛證道維摩竟棄家
立雪人來空悵望茫茫莫辨路三叉

舟過海昌哭簡田先生

矯首人天路渺茫平生知己最難忘西風亦有羊曇淚
今夜扁舟過海昌

八旬闈苑老詩仙名冠秋闈譽早傳常抱濟人心一片
若非成佛定生天

詠罷招魂詠八哀此情無路達泉臺莊荒陸氏何堪說
併乞生芻一束來

紀夢

寒食終過零雨濛墓門蕭瑟起悲風夢中彷彿慈顏喜
袖得新詩上阿翁

題周夫人荷淨納涼圖照

娟娟清露冷銀塘花外分明見靚粧試向鷗波亭上望
鴛鴦飛處總成行

蓮花蓮葉總關情並蒂同心過一生料得比肩人似玉
歌來水調盡雙聲

寓巢園主人有平湖之行忽憶嘉慶丁卯偕海上
沈吉雲女士同舟往訪東湖夜半余已熟寐而吉
雲朗吟二語云輝煌燈燭照花眠今夕渾疑欲上
天余夢中驚醒續之云夢醒不知江月墮濤聲飛
到枕函邊翊日微雨篷窗共眺吉雲吟句云辛苦
篙人篋笠肩濛濛細雨滿江天余又續云與卿好

比成行雁雙宿蘆花淺水邊于是同登弄珠樓次
壁間樓字韻詩時簡田先生適至亦有和章冉冉
已十載矣先生近歸道中遊而吉雲亦早下世感而有
作仍用前韻吉雲詩才敏妙遠出余上小楷雅有
董香光風格其年尚未三旬蘭摧玉折可慨也
夫

東湖昔日棹扁舟往事真同逝水流神女青琴虛夜月
詩人白骨冷荒邱三生夢影迷烟雨十載萍蹤寄水漚
殘稿飄零何忍讀不堪重上弄珠樓

女生徒以扇頭蟋蟀索題為題二絕

秋陰蟋蟀鬥新涼
花下安排小戰場
只有歡娛無警備
風流較勝半閒堂
閒調蟋蟀坐芳叢
單薄羅衣怯晚風
莫向个中爭勝負
卿卿都是可憐蟲

咏猫

客窓岑寂似枯禪
獵獵西風欲雪天
惟有狸奴解人意
薰鑪軟褥共周旋
花磚日暖睡初安
稍得餘暉亦自歡
知道主人書有癖
不教饑鼠損焚殘

雨夜述懷

暮半寒猶偏
鐙殘夜未央
艱難踈骨肉
衰病客殊方
風雨排愁陣
晨昏墮醉鄉
翩翩雙燕子
來往傍雕梁
風光交上已
宿雨釀陰寒
牆角日初上
樹頭花半殘
客衣經幾換
病骨護應難
屢誤尋山約
遊心亦小闌

花朝泛舟西湖遊淨慈聖因諸寺

遠景青蒼入望迷
水禽拍拍傍人低
春山似黛描剛就
新柳如烟剪未齊
飛閣參差籠夕照
畫船高下泊長堤
游人指點南屏路
早聽鐘聲度隔谿

帆卸蒼茫落照邊
歸途新月正娟娟
如斯花鳥添留戀
似與湖山有宿緣
好景易生今夕夢
癡心待放再來船

料應姊妹紅窓底同話清遊夜不眠

借月波馮媛同遊松顛閣有贈

籃輿小駐白雲鄉湖上花應避靚粧半日清言消我暑
一泓秋水浸人涼脩蛾早帶三生慧秀骨宜薰百和香
怪底高堂憐惜甚生來情性最溫良

軒窓瀟灑絕纖塵吹到芝蘭味自親脩竹千竿圍古寺
好山四面擁佳人詩題石壁留陳跡會預龍華總宿因
記取松顛高閣上一尊同醉玉壺春

游理安寺香泉上人出冊索詩即次元韻

古刹連雲起林深靜掩關窓搖萬个綠松繞四圍山熱

片時掃塵勞到此閒更逢知己話閨友適至坐久不知還

上方鐘磬寂結夏晝長闕佐茗嘗新粟憑軒看好山烟

霞原澹蕩魚鳥自蕭閒落日蒼茫裏清風吹我還

幽絕隔塵境清遊偶叩關泉香分法雨寺古借青山熱

客全消熱閒雲倍覺閒晚鐘聲動處人去鳥飛還

松影微茫裏幽居此閉關脩蘿寒掛壁飛閣瘦嵌山浮

世醉難醒高僧夢亦閒分明彼岸在度得幾人還

汪劍秋茂才以扇索題次韻

悲秋人向花前老水濶雲深愁浩渺香銷粉墜夜涼時
相伴寒蛩吟到曉

荷絲不共秋心老水佩風裳天樣渺
數聲絡緯送新涼
高歌一曲江天曉

詩人詩格秋花老秋蟲吸露秋心渺
他時補入棹歌聲
吹破湖烟霜鏡曉

蟬衣單薄荷衣老涉江人遠詩情渺
殘妝半卸粉光融
一池香夢迷清曉

西風嫋嫋蘋花老獨倚江樓秋思渺
箇中清味阿誰知
花房吸露蟲驚曉

河橋怕折垂楊老
影隨雲人去
渺銀塘絡緯聲漸稀
浦上漁歌一聲曉

誰說有情天易老蒼狗白衣歸
浩渺夜涼花夢被唵醒
殘缸如豆秋窓曉

屠琴隲太守屬題潛園吟社圖

公是天池鳳飛鳴下九衢
掛冠開別墅閉戶學潛夫
攜邑甘棠滿春風桃李敷
壺觴開北海醉遣萬松扶
湖山清絕地有幸得瞻韓
讀畫銷長日吟詩訂古懽
風神清似鶴姓氏馥於蘭
未必容高卧蒼生望謝安

海棠

穠姿憔悴倚芳叢已足嬌多不耐風
枝上幽禽無賴甚
夕陽影裏啄殘紅

虞美人花

當日深宮艷綺羅
明妝綽約占春多
名花亦抱興亡感
歲歲風前泣楚歌

開時宛似返香魂
落處還疑漬淚痕
炎漢可憐無尺土
美人姓氏至今存

孤山道中

夢想西湖已十年
游蹤得到亦前緣
人來滄海探春早
花到孤山得氣先
暖日烘開三里霧
凍雲衝破一溪烟
湖光如鏡山如黛
掩映虬枝分外妍

岳墓

南宋興亡事已空
巍巍祠宇仰英風
仙鄉兩度飄蓬過
既拜靈山又拜公
孤墳三尺峙烟村
碧血千秋今尚存
到底不埋家國恨
墓門風雨泣忠魂

謁岳忠武祠恭和

仁宗皇帝御製詩韻
獄成三字太無由
難洗當年宰相羞
破敵未能酬素志
報恩何暇問私讐
月明北地魂難返
風撼南枝恨肯休
祠廟煌煌留
御墨碧天雲淨正清秋

詔下金牌豈自由一人飲恨滿朝羞貪將半壁江山好
忘卻平生君父讎刁斗嚴時軍莫撼旌旗捲處局全休
黃金白鐵同時鑄憑弔郊原草木秋

雪後天竺道中

凍合西湖水不流衝寒又作雪中遊我來客路霜侵鬢
却笑青山也白頭
圖畫天然一幅橫匆匆過眼未分明回頭落日蒼茫際
高下樓臺玉琢成

贈喬妹仙夫人

記得清秋卸客裝庭前金粟正飄香此身好比營業

雙宿君家白玉堂

僥倖三生種宿因何期閨閣見斯人仲姬才調曹姑法
巾幘鬚眉迴出塵

廉吏風清門第高家貧井臼每親操河東三鳳人

五夜九熊不憚勞

秦嘉游學遠離鄉添得中閨一倍忙卅六鴛鴦

小姑要製嫁衣裳

舉案人誇梁孟儕十年琴瑟最和諧秋來接得泥金報

又累紅閨拔寶釵

征衫單薄怯秋涼客裏吳棉早替裝憐我病餘餐屢廢

更勞辛苦製羹湯

溫如良玉臭如蘭知己平生報稱難帶水迢迢勞遠念
尺書珍重祝加餐

△題朱檢之明經萬花叢裏讀書圖

衆香國裏卷重溫解語應須共討論幾陣暖風吹過處
朗吟喚醒萬花魂

俯仰千秋樂有餘好風翻帙故徐徐奇書自有名花護
不用芸香辟蠹魚

科頭把卷石欄邊讀向花前字字圓坐久不須頻點筆
飄來紅雨當丹鉛

自是天生絕艷才一編携向萬花開月中仙桂雲邊杏
都被君家收拾來

吳門喬八妹書來言及江西歐陽君堅賦詩八絕

以歸佩珊人說女仙才八字分冠其首口占誌之
歸帆一卸又經時乞米無書久絕炊難得西江歐永叔
編將姓字入新詩

次外見懷韻

遠書珍重意綢繆似水新詩替浣愁孤僻任人嘲仲子
長貧還自比黔婁憂無可解惟賒酒瘦不禁寒尚典裘
多感賞音頻索句擁衾唵到五更休

天邊霜月似潮來，落葉聲乾下砌苔。
兒女情深原是累，功名分淺莫論才。
苦寒人漸如蟲蟄，積久詩還當債催。
聽說春光今歲早，幾時同探嶺頭梅。

附元作

西窓旬日話綢繆，忽漫江天起別愁。
三載積痾思仲景，十行親扎慰黔婁。
海山待覓千年藥，家事真同百衲裘。
為怯寒威貪伏枕，依然筆墨不能休。
越水吳山幾往來，故園又長昔時苔。
便為海國雙寒士，成就虞山一秀才。
帶水也知洄溯易，殘年其奈雪霜催。
雞蟲得失渾無盡，且向溪邊問早梅。

紅雨樓觀桃有懷舊侶

幾番絲雨幾番風，釀得天桃分外紅。
病起尋春春較晚，籃輿扶入萬花中。

對花宛轉惜韶華，心事無端亂若麻。
如此濃春偏獨賞，同遊人悵隔天涯。

一枝高出粉牆東，認得仙源有路通。
含笑似迎前度客，無言都帶可憐紅。

嬌花多恐易摧殘，節過清明尚苦寒。
分付東風休作惡，好留顏色再來看。

十憶詩寄圭齋夫人江右

正是輕寒乍暖時春風吹面動相思憶君羅襪纖纖步
行過花叢蝶不知

幾陣興風送嫩涼濛濛波月下回廊憶君一種天然致
半舊羅衫勝艷妝

恨我生平酒力微相逢滿酌醉忘歸憶君一種詩書味
愛聽樽前玉屑霏

遠勞青鳥到連番風雨瀟瀟白屋寒苦憶荒厨珍味少
盤餐頻餽勸加餐

花前月底共徘徊憶得逢君懷抱開冰雪聰明蘭氣息
班超有妹果竒才

十分哀毀廢眠餐自失慈闈淚不乾憶得縞衣長慟處
梨花一樹雨中看

蘭閨姊妹列成行憶過君家意味長為惜將離貪暫聚
經營茶點替安牀

知己深憐范叔貧憶君推解最情真掃眉人帶鬢眉氣
不吝黃金贈故人

脫口吟成絕妙詞笑拈斑管寫新詩憶君天性耽風雅
硯匣隨身不暫離

靜穆閨幃息是非幾生脩得到青衣憶君生就和平性
歡喜常多嗔怒稀

春日病中懷圭齋妹

同心睽隔路迢迢
別後相思早晚潮
猶恐離魂消未盡
風風雨雨過花朝

香徑無人長綠苔
夕陽影裏獨徘徊
韶華九十渾如夢
桃李無言依舊開

長記分題到繡窻
愛君健筆獨能扛
留將蒲篋鴻泥在
一寸愁心那得降

聽得風前笑語聲
知君歡喜遠相迎
當時只作尋常看
此境重逢要隔生

病骨經年懶下床
聽風聽雨總回腸
欲知別後愁深淺

鏡裏添將滿髮霜

寄懷牧祥妹浙中

人生聚散本難忘
況值良辰好景光
記得年時湖上住
奚童來往送詩忙

高擎玉腕探驪珠
如此韶華定不孤
料得一春唵筆健
看花憶著故人無

詩篇酒盞興全刪
卧病朝朝靜掩關
海角陰多春易老
輸君占得好湖山

贈潁川夫人

酸寒骨相近衰年
珍重金閨月旦傳
靜女風神原秀逸

玉人心性本纏綿頻投縞紵慙難報得挹容儀亦宿緣
豈有雙瞳剪秋水荷卿青眼十分憐夫人聯戲及之

枕上偶作

西風蕭瑟欲霜天九月衣裳未製綿一縷新寒欺病骨
半宵苦雨警愁眠胃枯偏懶求靈藥眼澁還貪近蠹編
事到心頭拋不得厨荒漸漸断炊烟
聽盡風聲又雨聲秋衾如水夢難成關河寥落疎音問
骨肉凋零隔死生鏡裏自傷容鬢改愁邊不覺歲華更
命中磨蝎相隨慣消息何須問子平

觀察潘吾亭先生賜和鄙詞仍用前韻申謝

欣聞法曲奏遙天清儷幽蘭温比綿連夕鐙花傳好信
數聲靈鵲破朝眠心無點滓追前哲政有餘閒對古編
不改書生真面目官齋供養只雲烟
文章藝苑久蜚聲坐鎮巖疆政有成早見恩波霑下士
佇看霖雨徧蒼生安貧守道心原素後樂先憂願肯更
黍谷春回無限喜茅檐樽酒話昇平
吹到春風薄暝天秋衣檢點換吳綿試拈枯管賡高唱
頓撥窮愁穩曉眠剪燭半宵繙韻本對花三復捧瑤編
歲豐更喜魚蝦賤不到清明不禁烟
一片天風海水聲萬花飛舞句初成儒林循吏傾當代

兩詩當調特
先寫一先約

位業真靈證夙生玉尺寬量才苦短金針度出樣新更
江鄉近托慈雲託閒聽輿歌頌太平

沈沈宵柝不聞聲半晌含毫句未成嗟我身遭塵網縛
誦公詩覺道心生松身蒼翠能多壽玉性堅貞永不更
一代梅花推賦手翻從鐵石見和平

一聲新雁度寥天鐙影朦朧思邈綿好句半宵扶夢讀
寒香滿室對花眠儘多清課親刀尺分取流光入簡編
他日青雲如許附不教姓氏化秋烟

附觀察和作

風遞涼聲蟋蟀天傳來詩思鬱纏綿曲矜和寡知

遺俗人說愁多欲損眠翠袖久聞脩竹倚紅閨長
戀古芸編絕憐李嶠凌雲翮未破秋空萬里烟

春申浦撼夜潮聲作客心情近老成此處記曾投
刺地重來猶認棄繻生肯教入夢繁華暫頓遣安
貧志願更鶴俸待分憑寄語歲闌留取詠 昇平
許玉年孝廉見和拙作再用前韻奉答

籬花憔悴乍寒天茅屋荒涼雨脚綿秋氣黯消魂一縷
病軀渾似柳三眠忽來蓬島青雲客出示神仙綠玉編
半日清言消俗慮縱橫劍氣欲凌烟

八龍美譽振家聲一席名山業早成噓到春風總頃刻

照來青眼定前生雲牋快覩珠璣滿月旦新加氣象更
料得他年懸鐵網合教士氣一時平

△附孝廉和作

△霜嚴風急九秋天繞郭家家采木綿老去令暉貽
墨妙伴他任枵枕書眠新詩慨慷心如訴舊稿商
量手自編何止珠璣奔挽底驚看走筆似雲烟

△午夜蕭蕭木葉聲調高囑和句難成蹉跎歲月慙
書劍期許風雲愧友生鴻爪留痕尋舊夢鶴心警
露守殘更紅鮮轉漕勞當局卻喜波濤海上平
邵伯陳芝楣先生賜和鄙詞再用前韻申謝

虎
乍辭玉署下吳天襟帶滄瀛路亘綿竹馬朝迎人額手
花麗夜靜戶安眠鎖闥昔仰冰壺照彩管新成海運編
韋白風流遙繼美香疑燕寢一鑪烟

學嗷自愧未諧聲多感名公與玉成自昔交游聯四海
每從文字憶三生雲牋光燦才雙絕黍谷風和景一更
願附輿歌傳美政陽回葭管樂承平

△
力比蒼生筆補天胸懷朗徹性纏綿焚香畫戟頻搜句
行部江邨每晏眠戀

闕蓬瀛尋舊夢關心風土入新編花前驗取宮袍綠猶
帶當年

御座烟

春申江畔聽潮聲走筆驚看八韻成
既我驪珠真異數荷公青眼定前生
花前諷詠心頻折鐙下推敲字屢更
采管一枝橫掃處人間缺陷補來平

△附郡伯和作

△海上旌旗別有天壯懷幽思兩纏綿
城如營窟防宵警潮似風雷攪客眠
畢竟蜃樓空幻術居然蜚戶入新編
蓬窻卧看博桑日照徹東洋萬里烟

△掃眉才子久聞聲乳燕雙巢苦結成
夫人居貧不

子二皆工詩顧劍峯吳蘭雪與余言之最悉江上虎頭存弱息天邊鳳

閣慶餘生昨夏蘭雪病幾死著有再生草新詩入手商音變舊雨

傷心旅夢更願向媧皇乞頑石取來親補九峯平

△郡伯疊和四章再用前韻申謝

倚馬驚才賦自天吟情跌宕思芊綿
關心吏治常辭飲癖愛風騷又廢眠
宦蹟隨身惟瘦鶴官齋如水有鼓編
知公肝鬲通神處五夜清香裊篆烟

碧宵吹下鳳鸞聲快覩新詩七步成
燦爛天花如雨散紛綸妙緒似雲生
朱絃調古人難和黃絹詞工境一更
欲向春風披絳帳片帆待趁晚潮平

△附郡伯和作

扁舟蟻岸晚潮天
宦海勞蹤意渺綿
隨例舉杯防徑醉
催人就枕不成眠
簿書依舊從頭讀
花樣翻新信手編
敢向東南設治譜
焚如絲緒浩如烟

空谷蘭言響應聲
果然雲錦屬天成
高歌興到堪

孤賞清福脩來定
幾生讀曲樽前停
短燭

許榕皋大令見

示飲酒讀駢詞曲
敲詩枕上數殘更
吳淞畫處潮千疊
都

付雙蛾寫不平

梅花香趁小春天
浪跡梭投似織綿
估舶回翔驚鳥集
市帆安穩靜鼉眠
橋邊未訪機雲宅
海上新窺趙管編
太息年來入塵俗
難消漲墨與浮烟

報章欲去又傳聲
好句如仙擊鉢成
腹藁懸知

潘急吟牋親見露
華生船輸下水人
雙絕筆愧推

鋒夜二更明日片
帆歸歇浦江天
回首暮雲平

芝楣郡伯三賜和章
疊韻奉答

紛紛花雨散諸天
省識兜羅手似綿
句好不辭千遍誦
和難還破半宵眠
輓輸本倚東南重
治化還參風雅編
坐對九峯扛健筆
縱橫劍氣欲凌烟

天風海水助吟聲
艤棹江干夢未成
窓外怒濤兼雨至
毫端逸思挾雲生
才同舟楫饒經濟
智比盤珠善轉更
退卻鮫宮千尺浪
筆鋒如弩射潮平

附郡伯和韻

△此才端合住瑤天繭緒頻搜總密綿字響已同剛
百鍊功深何止柳三眠等身著作知盈尺隨手風
雲另有編斟酌癯仙留供養一甌清茗一鑪烟

△又聽長空款乃聲江關別賦動蘭成騷騷木末狂
颺起滾滾中流駭浪生跡本忘機情自狎身方蹈
險計難更者番出入蛟龍窟親見寰瀛萬里平

燦霞寄女以和詩來仍用前韻作答

一種聰明賦自天清於白雪軟於綿詩如浣露花初放
人似臨風柳乍眠刺繡餘閒親翰墨承歡多半藉詩編

瓣香為祝高堂健長裊金鑪壽字烟

恍聽天邊機杼聲七襄雲錦製初成高山流水慙同調
玉樹瓊葩許寄生風絮吟餘梅有信屠蘇酒熟歲將更
銷寒九九紅窻下簷鵲連朝報太平

附和作

霜落風淒秋暮天最闕情處葉纏綿銀鐙光冷閒
方坐珠箔香殘靜未眠綺思重重留繭紙清言媿
媿綴瑤編揮毫珠玉真難並攬勝齊州九點烟
無端絡緯自聲聲相助愁人夢未成雲際哀鴻風
正緊庭前白草露初生到頭世事滔滔去彈指年

華漸漸更卻喜新吟蘇倦眼一宵雅頌奏承平

咏雪用前韻

散花仙子下瑤天海水傾來盡化綿裘敝多年還想著
衾溫無力不成眠閉門且學袁安卧索句難同謝女編
此際顏垣茅屋裏人家幾處未炊烟

寒生肌粟不聞聲昨夜璇機織練成大海瘦蛟吹水立
小園枯樹訝花生愁來稍覺吟情減老去還驚歲序更
差喜牽蘿容婢嬾玉塵十斛砌階平

吾亭先生權臬蘇臺適檢篋中賜詩舊稿已歲瑄
兩遷矣感而有作仍用前韻

翹首卿雲隔遠天闔閭城畔草芊綿柏臺漏盡晨先起
霜簡銜青夜未眠早有清風傳逝聽慙無健筆記新編
分明皓月高懸處照徹吳淞萬井烟

檐前鈴鐸送淒聲排悶裁詩草草成瘦蝶依花尋淺夢
涼蟬警露感微生人傷離別春秋換病怕交涼旦暮更
斜日捲簾微雨歇一庭碧草襯階平

白薔薇花

誰向小庭栽年年滿架開久將仙露盥時有妙香來
波怕胭脂染清愁粉蝶猜最宜臨皓魄與月共徘徊

題嚶城黃紉蘭女士詩卷

與君同調最相親我亦無兒老更貧舉案已推高士偶
耽吟還現秀才身語闌風化何嫌樸詩到流傳不過真
洗盡人間脂粉習藐姑仙格迴超塵

答家心庵農部次韻

雨雨風風又送春客窓珍重苦吟身襟懷似水常能達
世事如雲莫認真癖愛湖山容寄傲早辭榮祿久安貧
新詩捧到挑燈讀共訝先生筆有神

高卧東山意若何功名原未算蹉跎閒嘗新茗邀僧話
笑把新詩對佛哦嗟我謀生常苦拙如公同調亦無多
膝前雙鳳亭亭立會看凌霄健翮摩

再答心庵

笑語歡承一室春，客中定省鎮隨身。
佳兒頭角天生好，老子雌黃未必真。
太白豪情猶有興，孟光舉案不言貧。
會看老圃風光美，秋到黃花別有神。
虛擲年華奈病何，平生事事總蹉跎。
雨如有約連朝至，詩不求工信口哦。
陳迹渾隨流水去，新愁還較落花多。
茫茫苦海憑誰度，願乞如來聖手摩。

圭齋仔妹夫太具林下高風，擅閨中詠絮，絮情同膠漆，誼等連枝，別經兩載，夢想為勞，離緒如絲亂。愁若絮爰繪折柳圖以贈，并系以詩。

相思悵望短長亭幾見飛花撲遠汀只有春來楊柳樹
照人两眼似君青

每到芳時憶舊遊風光觸目總生愁離情較勝風前柳
只有纏綿無盡頭

鏡中玉貌卷中身彷彿風前笑語親蘋藻勤幸衰兒女累
可能不減舊丰神

一幅新圖遠寄將迢迢烟水阻河梁白頭人倚東風裏
一度攀條一斷腸

題餘生閣集

節並松筠古詩同鮑謝傅蛾眉偏少福皓月不常圓釵

折悲青鬢珠沈感盛年餘生無個事細讀柏舟篇

贈許玉年孝廉

青眸一寸剪湘波冰雪胸中孕太和筆自如仙心是佛
平生寶筏濟人多

扶植風騷出至忱春風噓處散重陰長裘廣廈詩人志
後樂先憂宰相心

七百年來此異才吟情半寄水之隈携將第一生花管
唵徧孤山萬樹梅

細分畫品仿司空豈但丹青奪化工妙諦統駭文字海
由來萬派一源同

示我清唵一卷開銀河滾滾自天來驅風掣電驚人筆
壓到千秋庾鮑才

甥館曾吹兩度簫人間快婿苦寥寥風流遠勝周郎福
佳偶閨中有二喬君兩娶於徐

題玉年孝廉室比玉徐夫人手繪遺冊

懶拈湘管寫春山寫出花枝妬玉顏獨惜芳魂歸上界
采雲一片墮人間

賸粉零脂總惹愁三生艷影鎮長留群芳都仗追魂筆
一縷仙魂招得不

茅檐秋雨散如麻眼底俄驚爛若霞惆悵三生緣尚淺

未能識面只看花

閨中銷夏詞十首

紅窻日上破朝眠草草臨粧鏡檻邊忽聽鴉鬟簾外報
玉池新放竝頭蓮

蘭闥永晝愛臨池試展雲牋下筆遲一種嬌癡憐弱妹
手携紈扇索題詩

雞聲喔喔到窻前一枕薰風破午眠小汲井花調桂露
貧家不費買冰錢

紅欄六曲俯銀塘新換慵來浴後粧幾陣瀟瀟疎雨過
撲襟花氣送微涼

湘簾多半上銀鉤
露下高梧夜景幽
小蹙眉痕憑畫檻
每因見月動閒愁

吹到交風八伏時
陽烏如炙晝遲遲
深閨姊妹停針線
黃茗蕉窻共賭碁

一縷蟾光隙際穿
清歌宛轉綺窻前
納涼姊妹深宵坐
羅帳低垂獨早眠

泥痕洗盡玉枝枝
盃手金盆雪藕時
底事玲瓏難解脫
并刀截不斷荷絲

約伴追涼三伏天
相携同上采菱船
厨荒正苦無珍味
釣得脩鱗好薦先

雲幕初張翠幄開
穿針樓上共徘徊
一生守拙無長技
敢向天孫乞巧來

題吳蘋香夫人飲酒讀騷圖

離騷一卷寄幽情
樽酒難澆傀儡平
烏帽青衫鐙影裏
共看不櫛一書生

換卻紅妝生面開
銜杯把卷獨登臺
借他一曲湘江水
描出三生小影來

題蒙城張雲裳女士錦槎軒詩稿

尊甫吳中參戎

虎帳設兵畫漏遲
將軍韜略重當時
金閨喜有如花女
筆底風雲更出奇

耽吟人每倦調妝樂府吟成第幾章一樹玉梅初吐萼
清芬早已壓群芳

眉如新月筆如花鎮日清吟坐碧紗占斷吳宮山水秀

西湖講席譽昭華詩係玉年孝廉携來

展卷吟殘漏盡時慕君還恨識君遲深情一往才如許
細讀璇閨哭婢詩

文山司馬書來述尊閨朱夫人封股事敬賦

夫子遠行役衰姑疾篤時焚香祈佛佑剜肉告天知己
屆八旬壽終慳百歲期間閨傳孝行閨閣奉良規

謝庭多玉樹中外各分司報國勤

王事辭親痛病危十旬衣不解一力婦能支郵訃傳千
里應添涕似悲

晚春

啼鴉聲中餞晚春風光又換一番新曇花淺夢悲身世
細雨幽窓憶故人衰病經時親藥餌僻居差喜遠囂塵
榮枯得失皆前定一卷金經了宿因

題葉覺軒山人琵琶聯吟冊次韻

花間薄醉撥鷓絃惹得同儕爭向前皓月一輪更定後
荷香十里雨餘天未曾入調心先契縱不知音聽也憐
共賞新聲聯舊侶莫將幽怨訴當年

新秋

長簟逢秋夜不眠
新涼最怕雨餘天
麝鹽瑣屑經多病
門戶零丁偏暮年
境類煮砂難作飯
人憐辟穀未成仙
雙雙弱息還依母
相對窮愁卧榻前

典盡衣裳篋笥空
驚心最是遇秋風
鏡中鬢影全消綠
池上蓮衣半卸紅
舊夢茫茫難盡記
新題草草不求工
白頭猶有同心侶
收拾光陰蠹卷中

玲瓏山館冊題詞為葛秋生明經賦

誰唱黃河遠上詩
知音從古屬蛾眉
不輕嬌笑偏多媚
生就鍾情莫諱癡
來似行雲常緩緩
去同落葉故遲遲

玲瓏山館玲瓏月譜出玲瓏絕妙辭

美人韻致本天生
周昉當年貌未成
才子最難除綺語
好詩多半寓閒情
偶看荷露盤中轉
笑當珍珠掌上擎
一枕蘧蘧仙夢破
衣香人影不分明

金補之大令之官豫州留別同人外子次韻同作
癖愛風騷興未闌
凌雲筆健有誰干
廿年月窟高枝折
幾度天門立馬看
冷落家山懷舊友
風流花縣得儒官
關心他日培桃李
贏得名流爭識韓

宦情波處別情濃
冉冉流光幾度逢
同調相憐比笙磬
通家交誼似雲龍
閉門老圃空尋菊
放棹秋江正采蓉

從此天衢馳駿足青山紅樹路重重
傳世文章費汰陶儘拋心力不辭勞人如古劍鋒常斂
詩比明珠價自高天女定然工製錦庖丁爭許善操刀
政成博得椿庭喜更藉仁風起鳳毛
專城百里古諸侯策馬中原賦壯遊書卷依然存本色
循聲行見動隣州雲思為雨徐徐出水不生波緩緩流
載得新詩千首富虹光一路擁仙舟

題陳寄磻文百甃齋

蕭齋羅百甃境地極幽清入室崇闌契開簾縞袂迎
開朗懷裴叔則金石趙明誠時有高賢集名山業早成

七夕有懷圭齋妹

每到良時惹恨深當年歡會耐追尋樽前帶笑分嘉果
花底傳牋共苦吟慧性似君還乞巧癡情憐我有同心
徘徊此夕針樓眺清露無聲淚濕襟

張氏外孫桐遠寄窻課見其文筆清新綽有成人
架度口占八十字答之

憶爾垂髫日聰明早惹憐長途隨阿母歸省返吳天夙
慧能文字飛騰及少年祇愁相見少我老不如前
尺書憑雁遞道遠恐沈浮骨肉長年隔關河滿目愁佳
音頻盼望往事怕回頭寄到芸窻課清宵豁病眸

寄長女寶珠楚中

兄殤弟不育長女當嬌兒遠嫁違千里歸來定幾時辛
勤每念汝老病欲依誰兩妹雖常聚空教益我悲
飽歷飄蓬境深諳行路難親知半寥落身世劇辛酸汝
性能敦睦余懷略放寬翁衰姑又沒努力視眠餐

為鄭稼秋司馬題母夫人曹太淑人摯孝圖

奕葉名門後娥江舊有碑引刀剗臂肉和藥奉慈闈孝
婦心如攝哀姑命若絲倉皇難自諱終被侍兒知
遠游謀祿養八載客長安子職真能替親心常喜歡堂
前護萱草庭下灌芳蘭至性通神鬼如斯壺德難

夫子黃堂貴佳兒司馬賢令名傳後世純嘏錫從天金
石文章壽家庭忠孝延披圖深仰止如拜講帷前

題太原女士倚樓人在月明中圖照

湘簾高捲月當頭佳偶秦徐共唱酬想見畫欄人共倚
一聲新雁過妝樓

梅花標格玉精神冰雪襟懷絕點塵昨夜月明如潑水
臨風想見倚樓人

香霧濛濛濕髻鬟耽吟人倚畫欄干獨憐詩骨同花瘦
多恐清宵風露寒

猷唵人每戀黃昏月滿中庭靜掩門夜久一聲長笛起

倚樓人聽也銷魂

七字傳來當寫真還從句裏見風神何時一泛清谿棹
寫韻樓頭拜玉人

題梅花雙美圖

紅霞白雪鬥新妝鼻觀微聞蘭麝香看到羅浮春色好
人間珠翠總無光

笑携仙侶下瑤池來賞橫斜竹外枝商略香奩新得句
玉梅花底立移時

十洲三島寄游蹤仙佩冷然御好風昨夜月明涼似水
玉人雙笑出花叢

雪比聰明玉比溫夜涼雙喚凍梅魂畫師儘有通神筆
畱住仙山鴻爪痕

丙戌臘月二十五日 先慈太恭人忌辰感賦

地慘天愁日回頭六十春

儀五齡失恃今年六十一矣

傷心懷大

母哀慟過生辰

即是日也 外大母生辰

未識離親苦惟知索

果頻自憐憔悴質當日掌中珍

阿母彌留日 嚴親應試歸傷心終夕話竟作畢生違

蠹刺殘詩稿琴存斷玉徽空餘鸞鏡在擲地黯無輝

次韻答吳怡庵廣文

經時衰病輒高眠孤負風花雪月天塵世回頭同一夢

靈山不到已三年林泉有主總能樂瀟洒如翁即是仙
晚歲杜陵詩律細定知腰脚健於前

頃刻牢愁一掃空半宵仙夢馭天風詩題素壁篇篇錦
花放瑤池樹樹紅鏡裏蛾眉開巧笑壺中樓閣奪天工
雞聲唱罷晨鐘動身在寒窓紙帳中

丁亥三月二日外子生辰適赴繁昌詩以寄懷

衰年底事走紅塵大海茫茫試問津三月鶯花紫客夢
孤舟風雨度生辰拈毫曾記同題壁打槩還思共采蘋
安得薄田營數畝茅檐作箇太平民

客中消息竟如何陌上番風次第過屈指幾時還梓里
計程今日度淮河從來瘖樹花開少自古羈人失意多
手把長鏡獨歸去此翁猶不免悲歌

洞庭葉漁莊居士過訪草堂出扇索詩賦此應之
風雨春殘喚奈何韶華半被病消磨寂寥門巷苔封徑
難得高人踏屐過

索我題詩下筆難園林窈窕水雲寬秋花姿態騷人格
大好峯巒畫裏看

酒債花逋半未償新來珠桂費商量苦無妙筆書唐韻
轉累先生解客囊

詞筆縱橫尚少年詩人懷抱自超然笙歌隊裏春如海

獨結人間翰墨緣

竹繞池塘花繞廬神仙清福有誰如幽居自喜紅塵隔
課子娛親暇讀書

一春卧病掩窓紗欲拜名山願尚賒他日秋江容打槳
莫釐峯畔賞黃花

敬題守拙老人遺照

公蒙古人備兵江南因聽雲先生一言之托十年庇之

翻來遺蹟淚如絲往事從頭仔細思公賦遊仙剛十載
猶能拯我斷炊時

公賜有二百金一摺陸續取用今猶存什之一也

一回展拜一沾襟結草惟存虛願深公本施恩無望報
愛才心是愛民心

題趙夫人照

洞庭顧櫛山人室

鷗波仙館舊傳家雙管還開並蒂花煮茗調琴娛永晝
明妝人坐碧窓紗

朝朝臨鏡寫蛾眉忙殺生花筆一枝惹得鏡中人失笑
郎君原是虎頭癡

玉人生性太玲瓏繡出鴛鴦分外工閒向花叢吟好句
一雙才子坐春風

數聲嬌鳥隔花聽日影遲遲度廣庭翻出十眉圖樣好
鬥他七十二峯青

泛宅吳宮跡已陳感君珍重話前因萍蹤重聚知何日

一卧空山秋復春

題美人生竹圖

香霧朦朧濕髻鬟金波冷浸碧琅玕美人自愛居空谷
清佩珊珊翠袖寒

萬重寒碧影娟娟涼透羅衣人未眠只恐天風吹欲去
看來如霧復如烟

尋詩慣愛坐深更香影微茫浹月明賺得雛鬟無覓處
篋篋裏辨吟聲

梁荏林方伯賜示藤花吟館詩集即用集中留別

山左吏民詩韻奉題

著述功將風會移淵源騷雅見師資海邦新展名臣績
講席先符往哲期閩嶠千年沿學脈蘇齊一室得詩規
名山廊廟無歧轍退食委蛇有所思

藝林根柢在窮經六代三唐盡典刑俯仰千秋見懷抱
指揮萬象炳心靈真銓得處川歸海妙諦拈時月領星
想見官齋勤點筆直將古硯當新硯

風清鈴閣寂無喧依舊丹鉛朝又昏齊楚政聲留昔詠
杜韓家法壓旁門曾舒日觀高峯眺細把瀛洲往事論
燕寢一鑪書一卷漸看明月上苔垣

福曜頻移兩歲中再來茂苑看花紅但為政處都根學

豈以文名倍覺工籌海半宵心眷眷觀河三日旆匆匆
明珠百琲光生座喜照蝸廬四壁蓬

題蔭林方伯東南棠蔭圖卷再用前韻

聖軫屢共斗杓移保障東南事總資欽恤皋蘇今日化
旬宣申浦古人期岱雲萬戶瞻風采吳嶺三江奉訓規
兩地民情難盡慰來時增喜去留思

韋氏傳家衍一經詩書氣可化祥刑觀風徧得江山助
懷古非誇筆墨靈民事總應開國事福星原即是文
星廿年敬歷勛彌懋依舊霜鋒新發矟

竹馬兒童夾道喧重來已閱幾晨昏獨從金穀壽全局
徧為蒼生闢福門齊魯烟光懷舊蹟滄溟轉輝待新論
醇儒康濟原無盡早已勲名著外垣

記取民情祖餞中旌旗一片夕陽紅臨行始見居官好
遺愛兼傳得句工幾輩攀轅增戀戀翻嫌策馬太匆匆
幘幪深為吳甌慶從此寒郊息轉蓬

為蔭林方伯題重脩滄浪亭冊

一曲滄浪碧玉流中吳童冠紀來游溪山天借南園勝
觴咏名偕北郭留異代登臨懷子美百年文獻緬商邱
而今喬木逾蒼秀總為東南棠蔭稠

題汪海門蜀棧圖

終見雲從足底生又看山向馬頭迎
茲遊大快平生志詩好從無一筆平

忘卻崎嶇行路難蒼厓碧澗磴千盤
馬蹄得得穿雲疾特為竒峯一駐鞍

買牛龔遂政新傳叱馭王尊繼昔賢
賴有壯遊供健筆快看繭紙滿雲烟

越國傳家舊有聲披圖歲月十年更
祇今回首褒斜驛峭壁胸中岷未平

一病俄驚秋復冬披衣起聽五更鐘
主人默坐添愁思

碑子垂頭帶倦容深感故人存問數
劇憐衰質報章慵同心侶與佳山水
此境還期夢裏逢

一窻風雨夜沈沈夢破挑鐙擁被唵
裘散峭寒偏易覺病深薄醉已難禁
殘詩讀向愁邊

遙憶嶺頭梅信早難憑驛使寄同心
春朝閨友見訪有作

冰霜叢裏又回春窻旭朝開景物新
濁酒薄施償婢僕瓣香虔蕤謝天神
病來常恐為新鬼喜極還能見故人
雞骨自憐扶不起幾時健足履輕塵

歲暮雜咏

紙窗曙色尚朦朧試撥薰鑪火尚紅連日雪飄茅屋底
一分春逗雨聲中齏鹽瑣事刪難盡身世牢愁洗不
竟夕藥鑪鎗影年光景太匆匆

歲暮暮矣雪霜寒人過中年感萬端善病時時求上藥
耽吟往往廢晨餐翻來陳跡心如醉溯到離情鼻亦酸
淒絕朔風催雁陣蕭蕭木葉下江干

許泐漁明經枉和鄙章再用前韻酬之

飄來郢雪破嚴冬縹緲如聞太華鐘思入風雲原善變
氣吞湖海總能容才人花管言情妙姑射仙姿著色慵
細向寒窗扶病讀高山古調喜初逢

風透疎帷玉漏沈好詩一讀一微吟寒催朔氣春歸早
瘦到梅花冷可禁渤海珊瑚還待採蓬瀛島嶼快追尋
雲龍上下相勤勉燈火雞窓夜夜心

外子時同肄業書院

李碧山邑侯賜題蘭皋頁句匾次韻奉酬

口象
偉人豈第以詩豪明公起家進士早紅杏一枝映芳草
翩然鳧鳥下江南折獄能驚諸父老東南閭井十萬家
男勤耒耜女紡紗賴有神君成愷悌庶返淳樸祛浮華
虞山吳江頌聲起時聞樂只歌君子非無明鏡燭神姦
依舊芳懷佩蘭道南衙就養即南陔

時封翁迎養

進酒親看

南長寺

物在處
多心以
不存也

竹馬來為眾人父父為子庭誥諄詳聆幾回申江下邑
塵囂甚千里帆樯環巨浸公來惠義並時行製機新機
出舊維安民先期水利滋周迴三百里有奇天將盤錯
式利器終看波靜軒雙眉畚鍤聲中饒逸韻吟詩藉答
流光運誰料閨中瓦缶音許將風雅源頭問筆花灑灑
開紫微十光五色露未晞雲情霞思飛仙骨豈向畫圖
評瘦肥瑤牋捧到墨猶濕藝苑南針一手執他日期將
全豹窺人間重見青蓮集

△陳拙任山人見示詩集有贈

今代杜陵老長鏡歸計賒乾坤真獨立身世悟空花已

定千秋業何妨四海家西風正蕭瑟一雁叫天涯

范愛吾茂才以青梅見餉賦贈

難得詩人蠟屐經一簾微雨晝冥冥人間已過黃梅節
贈拙仙山子尚青

水雲鄉裏共閒居清話時還過草廬多感羊求交誼好
黔婁夫婿太迂踈

出樓地僻少人經白鷺群飛入杳冥玉樹成行書滿架
階前帶草鬥袍青

維德區區隔卷居會逢佳日款茅廬交情似水總能久
詩格如梅妙在踈

壽陶雲汀中丞五十初度即用集中丙戌十一月三十

日遊焦山用借廬上人韻自壽八律元韻

政事文章兩絕稀志存溫飽計原非東南山水仁風遍
松鶴交親道貌肥曾向懶殘分半芋肯從湘浦戀閒磯
綺齡早占瀛洲籍威鳳翩翩捧日飛

不妨華冢伴袈裟筆可通天似古媧秋水一泓心作鏡
朗雲萬里境無遮雄繁重鎮今為最治行長沙昔所誇
偶向松寥題妙墨龍蛇飛舞態橫斜
堅持道力足降魔架上青編手自摩

持簡頻傳資外擢名山幾向望中過蜀輜記補魚鳧闕

皖口碑揚忠烈多抵得鱷魚文一紙驪珠擊出鎮豬婆

元唱曾及豬婆灘故云

回首

溫綸幾度除廿年勛績不勝書功宣轉漕馮夷格鑿著
掄材竹箭餘陳臬方停壺口旆觀風又駐宛陵車試看
棠蔭家家徧借寇何人願不虛

勤民何必輟清遊疾苦周咨每一留勘水淮徐踰柏嶺
紆籌渤海渡蓮兜吳俗謂兜為兜當年巨猾曾潛跡此日澆風
又轉頭竹木閒來頻檢點未須弦管為銷愁

到眼瘡痍著力醫幹旋意外始稱奇百年創舉酬

宸眷萬里恬波副衆期東道人來欣有主南針車去更
無疑祇今五十平頭日半壁經綸一手支

江天放眼舊時曾振袂親捫百歲藤詩好總成無上偈
官高仍是在家僧南山頌處民齊慶東閣開時客快登
况遇劉樊仙侶雋雲梯同上一層層

祥雲瑞靄筆端縈合與湯陳並令名從古風謠採輿頌
未妨瓦缶附鐘聲一時規畫垂諸簡千古勲庸載在盟
早卜熾昌綿奕禩聯將萬戶祝長生

卧病三月辱香輪吳夫人過訪口占以贈

老我衰頽甚沈綿三月中藥鑪煎午夜病骨怕西風忽

荷雲軒降傾心茗椀同桂輪香正滿宿世本瑤宮

夫子風雲略天南萬里馳艱難隻手抵門戶兩家支柳
絮新詞敏丹青古法遺靈心真四映餘事究軒岐

交臂恒相夫人生一面難及茲欣把晤恨不早言歡滴
露毫搗錦臨風氣郁蘭多應慙地主草草具盤餐

讀韻樓學金稿題詞 吳門女子洪德琴著

一卷挑燈編雜感且哀早知埋玉驟何苦嘔心來小
讀原多事高吟惜此才餘文字壽耶以慰泉臺

示次女慧珠

留怕當前食指繁竟催汝去我何安貧窮倍覺分飛苦

兒女無多割愛難
早歲得甥情略慰
暮年無子影長卑
劇憐爾父衰顏甚
老淚縱橫相對看

題沈種榆夫人寒鐙課子圖

鏡臺大靜一絳橫
夜夜聽雞到五更
簾外月高霜滿地
機聲軋軋和唵聲

石麟頭角本稱奇
畫荻丸熊仰母慈
兀坐寒窗標句讀

儼然嚴父又明師

秋衣單薄喚添棉
鐙影微茫欲曙天
屋角啼烏聲太苦
暗彈紅淚和丹鉛

鎮日眉頭不放开
唵聲清切紡聲哀
東將如雪凌霜操

成就明堂清廟材

雲汀中丞見儀詩句宏獎有加并欲延課女公子

猥以抱恙未赴謹賦小章呈謝

隨車甘雨洗輕塵
行部南園正好春
魚鳥欣欣迎使節
風光初過百花辰

月漾金波萬頃開
每從河海見雄才
使君身是中流柱
直障洪濶千里回

景勝全憑健筆扛
使君才調更無雙
好花也解迎旌旆
明月隨人送過江

豫園桃李久成蹊
騎騎重來認雪泥
揮洒春風一枝筆

湖山佳處徧留題

略識之乎手一編苦吟往往類寒蟬明公竟許開東閣
自喜三生種福緣

何處能求肘後方感公垂手引慈航飯依倘遂平生願
長拜西天大法王

次雲汀中丞吾園觀燈紀事八首元韻

如此良宵興若何魚龍隊隊浴金波自公采筆標題後
更較揚州明月多
喜聽群黎慶歲亨風光宜雨又宜晴開尊對月掀髯笑
長共蒼生樂太平

火樹沿池列作行莊嚴七寶座中央華燈影裏文星現
花木同霑翰墨香

為重神功補聖媧

園右新建黃溇祠

好教比戶課棉紗翻新更

有丁家樣不是人間錦上花

萬里帆樯景象恢臨高憑眺首頻回金燈影裏歡聲沸
知是民情愛戴來

鎿光月影互相差剪紙玲瓏鬥色絲自有新詩傳勝事
不須絃索譜龜茲

碧桃千樹夾溪濱魚鳥相隨意自親忽吐長虹光萬丈
戲虹書法媿前人

正是吳淞奏績時，勸人樽酒有花枝。
祇愁紅旆匆匆甚，又送仙舟返劍池。

奉題雲汀中丞皖城大觀圖照次韻

皖城開府雄吳楚，山枕高墉曲抱龍。
千里巖疆作舟楫，半江秋水采芙蓉。
蒼烟莫辨襄陽戍，暝色遙傳建業鐘。
設笑雍容資坐鎮，一時草偃樂風從。

濛濛雲氣生峯頂，浩浩江流擁卧龍。
此日山靈迎節鉞，當年人鏡探芙蓉。
鴻名早勒千尋壁，高唱如聞萬石鐘。
遠樹蒼茫帆影外，使君憑眺衆賓從。

又次自題七絕元韻

紅亭恰對翠峩峩，旌蓋來時照碧波。
文采風流今似昔，一生遇合勝東坡。

奉題雲汀中丞采石登樓圖照次韻

景星煜煜臨斯土，虹采輝輝起一樓。
帝重巖疆資擘畫，人從曠代接風流。
來邀采石磯頭月，去剪澄江水面秋。
更喜時平息征戰，萬家鐙火繞蘆洲。
拄笏臨江登采石，仰天呼月上高樓。
心懷文字三生契，目送澄波萬里流。
危檻捫星清夜永，餘霞散綺碧山秋。
畫圖勒石留遺愛，種得甘棠滿荻洲。

陳梅岑先生倉山高第今日歸，然為魯靈光蒙題

倚竹小影敬賦五言二律申謝

靈光崇九旬清話備

三朝永憶倉山叟風流未覺遙題詩徧湖海結伴渺松

喬就養官齋樂瓊枝格並超

時就養哲嗣通
州少府官舍

茅屋秋風景多蒙珠玉題殷勤勞哲匠甄拔到中閨辭
足追陶謝人還侶阮嵇江頭遲擊汰何日訪丹梯

贈浚筠張夫人

綠窓人靜一編開甲乙丹黃細勘來自愧酸吟同絡緯
嫦娥偏不棄凡材

翠袖亭亭倚暮寒庭前湘竹淚沈瀾憐君早歲歌黃鵠

扶病吟來鼻亦酸

佳兒習禮又明詩教育辛勤賴母慈卻笑冬烘迂太甚
公然南面作經師

胡眉亭山人以移居映水樓詩見示次韻

飲罷天漿帶醉還手揮玉麈下人寰鐘鳴鼎食公侯貴
那及神仙一字閒

眼前風月浩難量不是花旁即柳旁日向水晶宮裏坐
詩成都帶妙蓮香

葉牽翠荇無邊碧花襯明霞分外紅水閣晝長簾盡捲
憑欄人在鏡屏中

月明風細雨餘天
池面平鋪萬朵蓮
金谷鞦韆川成底事
笑他枉費買山錢

題程母戴節婦傳後

便死終無益存亡兩未安
立孤綿厥後忍淚博親歡
節孝昭千古艱辛歷萬端
彌留垂片語讀罷鼻猶酸

題周夫人遺照

魏雨原少府母也

我亦髫齡痛母亡披圖雙淚早霑裳
丹青留下傷心蹟節孝遺徽發古光

森森仙桂露華滋奕奕高風仰母儀
至行從來天必鑒定多騏驥大門楣

太息春暉委逝波蕭蕭風木慟如何
惟將忠孝傳家學卅載名場著績多

訓子平生素願償早教泉壤發幽光
事生事死終歸孝請命晨昏拜講堂

天香月影散朦朧仙佩飄然返桂宮
吟到循陔雙淚落卅年花下板輿空

奉次芝楣先生上巳前一日南園即事詩元韻

朱甍碧瓦麗層霄路傍城南半里遙
楊柳風微宜入畫魚鱗浪細欲通潮
雲山似障排臨水蜂蝶隨人飛過橋
聽說愛才當代少欣欣爭赴使君招

桃花如笑柳初眠
觴咏怡情緬古賢
選勝又逢脩禊節
采風剛值快晴天
和光四照心同佛
麗藻紛披句欲仙
會待青青梅子熟
調羹更上慶雲巔

南園重建魁星閣遙題一律

飛閣臨南園
祥光仰北躔
空中懸鏡網
暗裏驗心田
百級丹梯上
三秋皓月圓
瓣香虔供奉
永證善因緣

又敬題一聯 大塊文章歸隻手 中天光耀覽

三才

題顏崑谷別駕江邨垂釣圖照

清福無過一字閒
本來胸次海天寬
紅塵熱惱知多少

莫怪先生戀釣灘

釣灘風味竟如何
山自青青水不波
別有經綸歸掌握
臨淵豈羨得魚多

輕衫稱體勝羊裘
目送飛花上釣鉤
行客往來頻指點
逃名誤認子陵流

漁弟樵兄莫浪猜
濟時懷抱出群才
誰知紅蓼灘頭客
多少公卿倒屣來

范今雨明府枉過草堂荷題倚竹小影次韻

會稽人乙丑進士前官高邑令時戊子三月十二日也

多感憐才一寸心
桃花潭水比情深
何期垂死茅檐下

快聽天邊鷺鳳吟

出塵懷抱濟人心句自纏綿意自深潮信匆匆催畫槩
拈髭猶是對花吟

殘春風雨警愁心釀得膏肓漸漸深漂泊不禁身世感
夜長還對一燈吟

眉亭山人以詩訊疾次韻

病到春歸尚擁衾五更還怕曉寒侵多君珍重裁新句
露盥香薰仔細吟
斟暖量寒幾換衾詩魔還被病魔侵硯田活計年來慣
累重蠶鹽雜苦吟

嫩涼漸漸透重衾夢破幽窓月色侵抱得蒼茫身世感
遣愁無計托微吟

詩篇藥裏壓羅衾消受茶烟半榻侵一自同心人去後
久無新句對花吟

用韻有懷圭齋

驚看樹底綻山榴往事真同逝水流節屆天中人海角
可能飛夢到瓊樓

欲往從之道路賒擁衾顧影獨長嗟也知良會成千古
紅淚偷彈對落花

寄呈芝楣先生吳門

捧得仙雲出玉堂七襄雲錦爛生光慙無鏤雪裁冰句

難副東風第一香時以梅花卷子命題

清和時節送蘭橈屈指流光三月遙滌得炎歌消卻疾

新詞一卷遣昏朝

地當衝要稱長才管領湖山生面開可念南園花月夜

幾多魚鳥盼公來

位業真靈種善因風流韋白接前塵畫船蕩入波心去

一朵蓮花一化身

繡餘尺牘

琴川佩珊歸懋儀

寄映蓼四叔父書

去歲得聞大人旋里佳音欣喜無極玉關迢遞邊塞風
霜想慈體倍增勞頓大人歷任繁劇著有成勞中道蹉
跌此亦家運使然耳刻下萬里還家聯床聽雨高堂數
載白日看雲知此際倍形怡悅也惟叔母大人先逝惟
空簾卷未免生悲賴諸弟學業日進足娛蔗境大人胸
懷磊落當弗以此戚戚也惟是三徑就荒草堂岑寂清
風兩袖未知作何料理姪女遭際迢遘家園破碎數年

來姑沒於堂翁喪於途壻守一瓊了無生色米鹽瑣屑
之外加以骨肉慘傷以致疾病叢生不能勤操井臼旦
夕旁皇惟恐有負先人期望之心耳天寒白屋久賦無
衣賴味莊先生垂念舊交憐才破格數載以來得免溝
壑生涯冷波日從事於詞章或作一跋或賦一詩藉博
蠅頭微利歲暮則索逋兼索詩而至者紛紛矣復以伶
俇弱息環繞膝前一水迢遙歸家日少定省久虛離愁
日積邇來魂夢常依依于吾父吾叔前未知何日再放
琴水之舟快覩高堂色笑也

答曹夫人書

陳媪歸接奉瑯函知玉體安和深慰遠念并承殷勤眷
注惠寄珍物自顧菲材蒙知己格外垂青獎許溢分且
感且愧陳媪既歸左右乏人未知曾覓有得力人否念
甚愚妣自別後貧病交攻加以筆墨應酬不覺日形憔悴
仲冬又得一女歲華行晚熊夢仍虛始悟造物弄人
顛顛倒倒想仁妹聞之亦為三嘆金臺遊眺想佳什又
增幾許家姑母朝夕過從閨閣又添樂事惜儀之不克
追隨也金環香佩附耳隨身如覩芳容咫尺矣路長紙
短不盡神依

寄華山弟書

春間接弟手書至今未作報音心甚懸懸妙自產後大病半載以來不能食飯強自支持耳奴回承惠皮服弟夫人推愛解衣感何可極但念彼此食貧寸心深抱不安耳服甚華美長短稱身春風送暖已早化白鷗飛去矣外間筆墨酬應頗繁近織雲女史從雲間來又添題咏之事渠畫甚佳因乞得一扇以供把玩望檢收之

致何春渚徵君書

日前枉顧荒齋匆匆未盡悃忱自顧菲材蒙長者知遇殘稿附之集中拙書銘諸石上抑何愛之深而望之切耶遂令閨閣中欣欣作千秋之想復承厚賜累累在長

者有加無已在儀寶深抱愧同在寃鄉益切不安耳古硯精雅異常恨無椽筆以副之以其端疑貴重未敢輕易拜賜非敢固卻也茲蒙來諭諄諄謹當什襲珍藏以傳久遠不一

答香卿夫人書

千里神交十旬濶別相憶之情筆舌難罄常夜夢君或花枝掩映或曲籬圍護總未能一近玉容親訴衷曲想因相思之切倍形相見之難也自握別後一病及三月延醫診脉或云是病或云是孕究莫測其之穀食久廢憔悴不可勝言矣追憶前此病中屢承遣

使慰問餽贈食物不勝今昔之感端節前遣奴至署方
知吾妹之病二兄之歸焦悶無似惆悵不已知之太晚
竟未及片紙奉候然魚日不神往藥鑪左右也承惠珍
簞溫柔滑潤夜寐晨興每感故人雅誼蘭烟到口恍憶
促膝時芬芳氣味也

復胥燕亭大令書

既披鴻製復誦瑤華詞翰之精妙獎許之過情感愧無
地新詞三復至一點秋從心起句不禁擊節憶數年前
讀大作題蕊珠宮花史冊三絕句神韻風調逼真唐賢
至今猶能諷誦固已早識仙才矣儀學殖本薄重以米

鹽兒女之累益復荒蕪乃蒙大雅以必傳二字勗之固
當勉事學問期副厚望於萬一耳夫人天上神仙女公
子天姿明慧重以家學他日至蘇得造娉嬛福地拜玉
容於繡幄聆淑誨於妝臺後塵許步榮幸奚如

復吳星槎別駕書

接奉朶雲復披雅詠浣薇牕下錦爛七襄刺繡簾前目
迷五色先生擅玉局之詩才兼龍門之史筆騁足青雲
公侯到屐尋芳紫陌花月增輝儀久耳鴻名未瞻芝宇
茲聆馨歆如坐春風輔嗣清言元龍豪氣兼而有之不
勝欽服儀少小耽吟中年多疾永晝拈毫藉丹鉛而蠲

念清宵聽漏對花月以言愁遇味莊師提唱風騷殷勤
宏獎感恩知己耿耿難忘前者偶學倚聲過蒙先生青
睞塗鴉婉弱說項情深儀愧知音先生真天下有心人
也書中推許過情撝謙已甚臨風三復且感且慙自茲
以往惟望時賜指南俾知趨向是則寸心所私禱者也
奉次元韻四章藉展傾仰之忱伏祈施之斧削幸甚不
備

附來書

河來滄城有年矣聞夫人之名讀夫人之詩竊謂
海上神仙可望而不可即而一時之學士大夫下

交於河者莫不盛稱夫人之德之才殆可媲美於
漢之班昭晉之道韞而近日之閨秀不足方其萬
一焉河學愧蟬鑽才慙匏落頻年壓線翰墨多荒
以故俚句蕪詞亦未嘗輕達於琴書之側蓋鷺鳩
之不敢仰鵬翼并蛙之不敢望雲虬爾去冬除夕
前一日在不思議齋見夫人瑤花一闋情文相生
辭意兼到讀至人間兒女有多少花辜月負之句
不禁擊節嘆賞黯然神傷者久之以為天下之有
心人無若夫人者矣適是日復軒來齋備述欽慕
之意兼達願見之誠乃於是日造潭請謁蒙夫人

雅意殷拳溫詞獎借坐芝蘭之室讀珠玉之篇不特言論風采令人傾服而詩書之氣盎然粹然蓋望而知為仙品也憶昔從朱石君相國遊幾二十年皖江粵海到處追隨凡手訂詩文莫不口講指畫善誘循循近復蒙李味莊觀察以通家子姪加意教誨平生感恩知己惟此二公而夫人接見之下不棄顛蒙開我茅塞古人一字之師終身以之河雖不敏竊於夫人有厚望焉漫成四絕以博一粲尚祈進而教之幸甚感甚不宣

致瑤華夫人書

催夢雨多妬花風急掩牕兀坐抑鬱無聊忽接朶雲感慙交集儀下里之音謬蒙夫人見賞直以蕊珠仙客譽之其何敢當并承七襄下逮眩目移情盥手炷香對花捧誦至東風吹夢欲醒時不禁嘆絕風行水面乃知別具靈根非允婉所能彷彿也復承夫人雅愛有乍喜翻嫌見面遲之句而儀因近有幽憂之疾數月纏綿幾至絕粒復以珠桂之累散去僣從數人嫗泣於前兒啼其側我輩鍾情尤難解脫所恐多生緣淺未得瞻仙子於瑤臺為惘惘耳

致香卿夫人書

數月以來未奉瑤華未知吾妹近體如何倍深馳系愚
姊家務紛紜於七夕前挈三女一婢歸省琴水欲暫作
息肩計不意自中秋後諸甥女及小婢俱患瘡長甥女
尤重至今尚未起床此間長鬚赤腳止一二人以致徹
夜無眠實生平未歷之境自嘆賦命之薄不能數日安
閒知吾妹亦聞而憐之也頻年閨閣同調無多回思數
年來承吾妹相愛之情體貼周旋有踰骨肉一旦帶水
睽違芳輝遠隔又不禁觸緒傷情也故園風景甚佳芙
蓉爭放恨不手折一枝為君簪鬢眼前花月助我懷思
偶成一律藉誌離宗用書羅帕置君懷袖以誌永好耳

芳孫女兒聞我致書阿娘瞻依之念見於詞色消瘦形
容迥非昨貌天氣驟寒欲為料理綿衣頗費周章二兄
大人案牘殷繁履候何似吾妹亦祈時惠德音以慰懸
懸餘惟珍重加餐是囑

復陸藕房明府

故鄉回首會少離多朗月空懸天涯咫尺離情寄流水
斜陽身世似西風敗葉蒙先生以文字知深過加青睞
高誼如雲有同骨肉乃復移玉河干使儀何以克當非
敢踈失若是共度台旌未必降臨而城中諸姊妹又以
一握手為幸聞信之下命輿疾返已不及瞻仰矣何一

面之慳也又承厚賚于是沽米二石歸有餘糧皆出先生之賜感何可言儀今歲困阨更甚疇昔歸後逋負紛紛莫知所措念非詩人何少達而多窮若是耶

致萬蕙山大令書

一隔清輝屢更寒暑伏稔世兄大人政祺時懋福履日新初領京江再遷茂苑德音日近忻慰奚如遙稔蒞任以來定多佳勝飄來琴韻人驚花府神仙吹徧春風鳥啄訟庭芳草蕙以斑衣樂志官舍傳經知德門衍慶倍多樂事也儀米鹽累重兒女債深不覺日形憔悴七夕前歸省琴水家君山居寂寞疏水日供祇可自怡更難

兼顧儀本秋雲賦命動輒違心隨來三女一婢同時患瘡呻吟一室頗難為懷故園風景雖佳徒增感慨耳擬於旬日間挂帆歸里秋鐙殘漏未成九月寒衣帆影西風空載一船涼月蒙世兄大人以文字之知兼骨肉之誼輒敢縷縷及之

再致何春渚徵君書

朔風連日釀雪未成霽色新開曉寒尤甚未審文人眠食若何念念年來仰荷高情屢承吹植每一思之且感且愧天寒白屋清景如繪挑鐙手製像真珠花兩枝擬取其值以助薪水因思采珠女史具林下風翩翩珊珊

雅稱此花未知能見而憐之否倘綠雲豐膩尚嫌花瘦
或寶髻玲瓏轉憎葉密又或石氏珠多底須魚目或謝
孃裝淡祇御文犀亦無庸強為之也瑣瑣之請幸弗見
罪

再致胥燕亭大令書

夏杪拜違道範光陰荏苒自秋徂冬每憶雨牕賡韻花
底傳牋方謂長聆清誨藉識指南何文旌之無定若是
耶抑劍氣珠光人爭快覩已亦莫能自主耶儀學問謏
陋蒙先生以文字知過加青睞吹枯噓生不一而足且
感且愧故園小住風景雖佳情懷甚惡女病婢頑呻吟

一室賦命甚薄求數月安閒不可得也歸後逋負紛紛
莫知所措向蒙味莊先生十年長養一旦攝篆吳中益
復煢煢孑立儀非詩人何少達而多窮若是耶賢夫人
近體若何女公子學業日進雀屏曾中選否念念

致張筠如夫人書

梅信催春東風送臘料想玉體綏和吟懷懋暢訢慰無
似采筆調鉛桃花醜面韻事又增幾許儀小住琴川匆
匆返棹塵勞碌碌候久疎閨友中驚聞世有謫仙欲
托儀轉求墨梅一幅固知非第一人不能寫第一花也
但霜風頗厲玉指太纖寸心實切不安耳倘案頭有舊

製吉光片羽雖殘缺亦不妨也

致味莊先生書

晴牕鵲喜屢盼旌麾曉枕夢回愁聞鼓角滿擬早梅同
畫舫齊開福曜偕春風並至多士皇皇群黎切切固不
獨花間問字人也邇來想夫子壽體綏康諸凡順適民
事勞勞飲食起居一切能如舊否春渚先生來述及夫
子宦况更清於水其何以支持聞世兄嫂扁舟南下承
歡朝夕並免兩地懸懸且喜且慰儀小住琴川匆匆返
棹西風滿鬢涼月一船翹首絳帷御雲遠隔慨何如之

致心芝夫人書

十載以來追隨繡幄月夕花晨屢承色笑每憶曩時試
鐙風裏剪燭傳觴極勝遊之樂今則靜掩綠窻聽殘跡
雨每逢佳節便觸離情想夫人亦聞而憐之也未知仙
舟何日言旋紅窻采繡想復纍纍小世兄近體定佳宛
轉書聲想常和阿孃刀尺聲也

壽家大人書

數月以來得承色笑一旦遠離膝下思之黯然後以孱
弱之軀昏庸之質遺兩大人深憂寸心尤切不安重勞
慈訓諄諄晨夕不倦安貧守樸以儉以勤既慮其生前
復計其身後是誠無所不至矣雖未能語語參透卻時

時在念隨歸兩僕前僕即遣後僕較優媪即薦於本城
金氏前因諸女及婢病俱未愈途中借彼一用且念其
遠方覓食不忍遽遣亦不得已也

復味莊先生書

會逢令節正繫離思忽奉朶雲如親色笑吾師知遇之
恩長養之德山高水深莫名其感惟願他生轉輪膝下
以慰寸忱耳

附來書

滬城淞浦久宦如家自署篆以來忽忽八月即溪
山花木尚繫寤思何況吟社同人能無馳念昨已

得遇蕙使北來之信而即能接篆與否猶無確耗
倘其先行入覲則往返又須兩月遙計携酒南
園已在梅花零落後矣頃接手書深承屢注清齋
景况可想而知春田太守蕙山大令亦無不念及
想必皆有所將以佐歲事也僕迂拙依然愧不能
多為布置特具廿金祈檢存為幸佩珊夫人近著
益詣清超而尺牘尤加雅令臨風三復感佩交深
惜薄書填委排撥無才握管躊躇不能一屬和章
為愧耳

致道華夫人書

江頭話別歲序倏更春光又到紅杏梢頭矣蒙二兄大人暨賢姊夫人一往深情十分雅愛思之黯然惘然歸裝滿載珠璣晨昏捧誦幾忘寢食茫茫宇宙似此仙才得未曾有惜帶水睽違不能常奉教于几席間為深恨耳儀處境益艱造愁益幻齏鹽瑣屑支詘百端兒女伶俜啁啾一室翰墨一途愈趨愈下間有酬應亦強半非意之所欲出也邇來更為病魔纏擾因愁致病因病愈愁未知何日出茲苦海掩窓兀坐只覺春風冷峭負此錦樣韶華矣聞二兄今歲應味莊先生之聘又可快聆指示忻喜之至伯母大人喪中賢玉臺哀痛勞瘁之餘得不至大損眠食否念甚不一

上康合河方伯書

合河大人閣下伏惟大人壽齊松柏名並山川以忻以慰去秋歸琴水捧到大人遠賜石刻古香滿紙蒼秀絕倫三復摩挲永為世寶始知偉人出處夢亦通靈天心固鄭重若此鴻製氣格沈雄風神超邁讀至天與清和化日長句仰見大人精神福澤之綿遠謹步元韻三章不足表揚盛德於萬一聊誌景仰之鄙忱耳前呈詩草才力卑薄愧不足當宗工鑒賞乃蒙大人親授姬傳先生刪選抑何遭逢榮幸若斯耶青蠅雖微得附驥尾

遂令閨閣中欣欣作千秋之想儀少小耽吟中年多疾
米鹽累重兒女債深壻守一瓊了無生色家君蔬水日
供勢難兼顧竊念大人置身伊呂於草澤孤寒尤殷提
挈况一枝小草素沐恩暉乎刻下壻買舟白下晉謁崇
墀倘得引而教之感且不朽臨啟瞻依

復味莊先生慰問殤女書

荷風扇暑松徑迎涼伏稔夫子起居恬適聚順康娛滌
采筆于冰甌寄詩情于水月調將綠綺鶴亦來聽書就
練裙鴻爭欲舞曷勝忻慰日者屢蒙遣紀慰問頒賜多
珍慈懷高厚感切五中儀貧居多病復賦悼殤拘荷不

斷引緒愈長作繭自圍藏身彌窄間有紅閨伴侶好語
相規吟社親朋投書作慰終未嘗一動於心蓋質到鈍
根最難解脫自蒙夫子賜書中有小傷感三字不覺沈
吟半晌悟前此之過情於夢回鐘動時細思之恍然若
失始知夫子用筆微妙能超苦海而登彼岸較如來妙
諦殆有過之也庭露簷風諸祈珍重

復沈吉雲女史書

屢奉瑤華頻承佳貺塵緣碌碌裁答久羈歎何如之賢
妹瑤宮仙子偶謫人間秉芝蘭之氣韻抱冰雪之襟懷
豈區區吟風咏絮所能彷彿哉儀賦質既鈍復溺愛河

蘭集詩屋
愁縈病縛輾轉沉迷未知賢妹能一引慈航而渡登彼
岬否恨不從君於卅載前耳病目致屢高懷自謂仙緣
非淺幸何如之折贈黃梅雅稱紙窓竹屋聞香對影何
殊親覲芳容也

上周聽雲先生書

伏念璜與儀才質凡鈍境遇坎坷蒙大人憫其孤寒憐
其弱植長養深仁隆於山嶽自聞絃議之信數月以來
寢食靡安今又聞玉闕萬里之行海濱士庶無不深為
扼腕不獨璜與儀之心碎神馳也然猶幸大人懷抱灑
落天機超曠榮華固不足動其心困阨亦何能移其志
儀雖未仰斗山而誦公文章悉公性情固已深知之矣
且天下事本無定局冰霜之後必有陽和陰雨之餘定
逢開霽况大人文望素隆清名夙著久為

聖主深知者乎

恩旨之加定自不遠儀四叔父前曾屏藩浙中後以事
謫戍此日歸來優游林下已三四年其年亦正與大人
相上下也聞大人自挂冠後日以臨池為事其德性堅
定不為外物所累已見一斑文瀾浩瀚加以絕域山川
之助碑板光華流傳瀚海鴻濛萬古此之天得此鑿開
生面固知山靈之深以公之一至為幸也惟念儀向者

一篇一咏隨時可以就正几席今者絳帷萬里塞雁常
踈言念及此不禁黯然欲絕然草堂八口依舊賴公存
活鄉雲雖遠德輝固自常留也抑更有厚望于公者儀
少小耽吟歷二十載恐終湮沒無聞異日俟公歸來錫
之一序得與瞽先生並傳久遠實平生之至願也邇來
未知道履若何飲食得不至大減否山川險阻行李蕭
條策馬長途正逢溽暑到後風土殊絕飲食異宜起居
寒燠總望加意珍衛是禱臨啟瞻依

又

望窮雲樹懷感日增忽捧瑤華悲喜交集三復賜書道

氣盈行古光滿紙至理明義析豈尋常所能彷彿於萬
一哉故其過也必使之歷坎坷而達亨衢蓋天亦獨垂
青眼不以尋常視之也以非此不足見其學問發其文
章焦桐入爨幽蘭被鋤千古同慨而芳香雅音豈能終
闕耶儀初聞大人遷謫之音惋惜抑鬱莫可名言既而
側聞三吳士庶無不同聲扼腕則又私心竊喜蓋公論
自有在也龍沙萬里握管書經人世不堪之境夫子處
之成極樂國蓋亦平時學力堅定所致也然深閨兒女
感恩知己不能無動于中翹首天涯淒然欲絕曾秋日
眺望得一絕云西風落日慘離顏衰柳長堤不可攀願

借頰頭雲一片隨風送過玉門關寒夜聞雁聲淒楚出
視雲淨遙空月如潑水復得一絕云皎皎當空月一丸
憑欄無語幾回看誰憐今夜關山客踏破濃霜馬足寒
鐙下再展賜書又得一絕云征鴻昨夜度關河尺素傳
將感慨多賺我兩行知已淚金閨此際更如何賜書中
所云心之相照萬里庭戶信有之矣前者高山咫尺未
遂瞻依緣鈴閣深嚴非奉命不敢冒昧也惟願大人他
日玉關返旆於綠野堂邊小築一椽晨昏問字平生之
願足矣但儀命薄如雲愁多於絮境遇累之疾病迫之
幸遇賞音暫免溝壑貧居鬱鬱慘不成歡近日復患口

齒之疾質之醫家均云難治未知能留一息以待公否
言之黯然書中屬望過深獎許已甚愧不能仰副萬一
耳印官蒙兩大人及世兄嫂恩勤鞠育日就長成一枝
小草移植蘭階有欣欣向榮之意文字緣兼骨肉情矣
雖廣廈長裘係公素志而三徑蕭條祇餘琴鶴未免又
添一累耳邊關風雨伏祈加意眠餐臨啟無任瞻依感
激之至

繡餘詩餘

琴川佩珊歸懋儀

壺中天 重陽前三日兩窗偶成用小湖田樂府韵
冷風疎雨做愁天巧合善愁人意黃雪飄零堆玉砌屈
指重陽將至花徑三三三圍屏六六六遍是傷心地慊慊多
病紗窗雖設常閉一任塵掩菱花蠹殘殘緜帙更有
何情致舊事思量渾似夢天付可憐身世瘦比疎梅眉
同病柳凋却眉峯翠霜毫枯盡怎傳千萬心事

前詞味莊先生枉和前詞疊韵申謝

五花迷目看層層翻出驚人新意一片天風吹海水頃

刻神山移至剪水無痕裁衣沒縫占盡千秋地
躬吟珍重晚窗風峭須閉卻愧愁逼毫枯思隨
腕弱未盡纏綿致慣向兩聲燈影裡寫出蒼涼
身世得內酬花投書招月拋卻殘膏翠分來
鶴俸飽餐終日無事

附元作

素秋風物儘關情遣作畫禪詩意佳色西園催令
節細雨偏將愁至姑射山遙閨風苑渺沒个埋憂地
棋聲琴韻還拚花院常閉聞道風絮吟成月眉
掃罷更雅人深致魏國詩篇清照筆百又生名世
紫陌浮雲黃梁幻夢不植雙雙峯翠東籬送酒

莫辜陶令花事

前調 味莊先生再賜和章三用前韵

開緘歡喜諷新詞語語感人真意一種溫柔敦厚旨此
境問誰能至文證禪心詩通畫理絳帳談經地仙毫揮
處直教花月羞閉多謝錦字頻頌雲璈疊奏獎慰殷
勤致落落知音當代寡翰墨緣深前世貴比兼金珍同
拱璧賤却閒珠翠朗吟低誦掃開多少心事

附原作

一枝柔翰到君家宛化連環如意自有詞源能倒
峽妙緒如川方至遇舊翻新回難逞巧活潑潑山

地著書何用花間庭院常閑 藉甚南國香閨拓
花咏絮競詡風人致我識藐姑真妙相不逐艷妝
時世海上餐霞花間吸露眉染仙山翠集名倦繡
針神原是餘事

前調題二喬喜子圖

霸圖消歇有丹青留住美人顏色姊妹蘭幃雙美玉
面雪花紅白貌疑娘英風似風頭角真奇絕枕戈人遠
一羣么鳳隨膝 難得絕代名姝珠聯璧合嘉耦真無
匹過眼江山渾似夢粉黛空餘陳跡韜略繡殘明珠入
掌繡閣消長日豔名奇福至今佳話留得

前調題惜花圖

穠華如錦早匆匆開了枝頭紅杏一種憐香心事苦直
欲將花作命對景含愁銷魂無語立盡春風影苦吟人
瘦怎禁如許清冷 還將一縷柔情千行密字深體花
情性劉阮當年仙福少讓與才人管領彩勝高懸金鈴
低繫只祝封姨靜新詞剛就慢聲吟與花聽

金縷曲次韵題傳奇補裘圖

夜靜聞花語似嫌他投桐入爨種蘭當戶已自拈針嬌
無力頭緒纏綿爾許最好是愁邊眉嫵蠟淚涓涓為君
畫運心機細引絲千縷涼露偏知否 蠶絲未盡蠶

心苦是誰夢描三生夢影髮影容光分明在壓線春宵
坐而生拆散文窗仙侶一縷仙魂招難到送行雲飛上
情天去今生恨再生補

探春令 花朝和韻

風扶弱柳一株株盡是離人緒更無心聽梁間燕語又
那解詞人句 白衣蒼狗難教住去便從他去寄幽情
一縷杏花枝上縹緲雲深處

前調 憶幼女吳門

疎燈一點閃窗櫺觸萬千情緒前宵聽啞啞學語猶伴
我吟詩句 明珠入掌留難住乳燕辭巢去恍啼聲在

耳翠時分散夢也無尋處

前調 答閨友

陌頭紅紫鬥芬芳動探春情緒立花陰立聽黃鸝語成
就了驚人句 韶華似水難教住遮莫匆匆去怕柳棉
如雪東風無賴捲入雲深處

前調

日長人倦怯春寒睡也無心緒聽聲檐馬回風語抵
多少淒涼句 遣愁依舊留愁住何處尋芳去這愁城
苦海朝朝暮暮教我如何處

前調 會施夫人

玉人夜夢太酸辛
惹起纏綿緒
背銀釭
向檀郎細語
又成了銷魂句
吟來雙淚流
難住無計教愁去
歎生涯
一樣清清冷冷斯境真難處

因愁造夢夢生愁
不盡春蠶緒
恁傷情待向誰人語
且和了陽春句
縱然無計相留住
任忍使匆匆去
這生離滋味比君死別更有難言處

前調

閨友以畫易詩有贈

畫禪詞筆底玲瓏如許多
才緒寫名葩
欲笑還如語錯
換了巴人句
居然富貴留春住
雙燕時來去
好安排
筆硯研朱滴露日坐花深處

鮑家小妹最聰明
藕樣玲瓏緒
芳名口共心頭語
記曾讀香奩句
飛瓊謫向人間住
青鳥時來去
惹妝臺一笑
桃花扇上點點鴉飛處

唐多令 題雙美圖

倦繡午晴初
還將姊妹呼
竝香肩
纖手親扶
相視不言情脉脉
笑問道是何書
時世淡妝梳
臨風曳素裾
似亭亭
兩朵芙蓉
曾向湘皋留半面
嬌模樣有人圖

前調

幾度喚真真
梧桐影裡人
立斜陽
滿地涼雲
信步不嫌花徑滑
微褪了繡鞋跟
風柳小腰身
蛾眉最善顰
罷

鞦韆微綳湘裙莫是凌波歸洛浦行一步絕纖塵

前調

烟雨太空濛詩情杳靄中蘸清波柳間桃濃買得扁舟
輕是葉雲淡淡水濛濛歸路夕陽紅歸心愛好風櫓
聲柔搖過垂虹指點前村家漸近苔蘚護白雲封

南歌子 題漁笛圖

水國秋涼早幽人逸思深漁燈隱隱夜沈沈瞥見橫江
一鶴度遙岑長笛飄來遠扁舟何處尋四山風急老
龍吟吹得一九涼月墮波心

前調 題撲蝶圖

春色宜人意東風撲面香玉人倦繡立斜陽瞥見一雙
鳳子出花房羅袂飄飄舉齊紈緩緩張翥時分散
又成雙愛他輕於柳絮潔於霜

百字令 題四時行樂圖

光陰過客問幾人能數及時行樂檢點一年花事了
只是朱顏非昨寫上丹青留將面目開卷心先覺玉
顏不老名花常自含夢常念泡影功名浮雲事業
苦苦將身縛名士偏償花月債胸次恁般開拓絡秀括
花雙鬢進酒不用愁離索人生如此底須還羨侯爵

長相思 題畫

花韻清詩韻清脩到梅花定幾生相看各有情 雲
漫漫雪漫漫姑射冰肌偏耐寒春衫杏子單

柳梢青 題香草美人圖

玉骨珊珊芬芳自愛只侶湘蘭杏子衫輕棟花風細人
倚湖山惜花擔盡春寒驀地裡雙眉自攢悄立無言
含情凝睇半晌低鬟

前調 題倦妝圖

仙貌如花柔情似水以月為家長爪支頤香羅覆額
雲鬢欹斜 盈盈二九年華小顰蹙愁耶病耶倦綉
心情暮春天氣珍重些些

百字令 呈祝簡田先生

綠陰如水正清和時候先生歸矣書畫一船人似玉絡
秀賢而竝美蘭砌樞衣春風聽講許問之乎字清言忘
倦樹頭涼月飛起 嗟我似絮行踪如花薄命直到如
斯地盼得公來我又去難忍兩行清淚無力依人多情
自悞種種非初意郵程三百素書還望頻寄

前調 題倚竹圖

羅衣如水正涼風天氣怎生禁得竹外無言會久倚吹
墮滿襟蒼雪飲黛疑吁含情欲笑人比梅花瘠詩情何
澹畫圖難以著筆 最憐絕代佳人亭亭獨立如許

清標格夢躡千山
驂綠鳳篩碎全身
明月與菊為隣
招蘭作伴想見吟懷
逸伊人何在九峰
深處尋覓

前調 俞陳古愚姻丈仍用前韻

薰風簾幙晝沈沈
棖觸無邊幽意六
曲屏山間倚徧天
外采雲飛至月到
天心風來水面恍
涉靈山地浣徽三
復寸絨無限開閉
堪嗟蠹蝕芸編塵
封硯匣絕少閒
情致一種愁懷深
似海應悔托生斯
世誼比青雲詞翻
白雪筆染吳山翠
報瓊無計劈牋重
訴情事

如夢令 題美人玩猫圖

滿院秋光如洗一角湖山
獨洗幽思正無聊
蒼地雪奴
潛至伶俐伶俐會得
个人心事

長相思 題柳陰聽鶯圖

柳絲高柳絲低繫住
青春莫放歸休教作絮飛
聽流鶯罵流鶯莫向
枝頭巧弄聲愁人夢
易驚

蘇幕遮 和海鹽張步萱女史韻

路迢迢人杳杳
郢曲飄來卻比梅花
早百尺瓊樓臨大道
綠淺情深知否容
儂到 貌如花才恁
妙賺我懷人譜出
相思調讀罷重將
癡女教撥盡醯烟
繡被餘溫少

又

海般深天樣杳一縷
柔絲繫定儂心早
翰墨緣深交有

道水復山重夢裡尋君到
太心靈真語妙一曲弄琴
遠寄高山調慧業前生何待教
閨閣憐才得似卿卿少
又

漏聲遲清夢杳嗟我窮愁青鬢生花早
身世悠悠何足道
怎及卿卿福慧雙脩到
句何蒼年恁妙月底花間
宛轉翻新調
遣悶試將鸚鵡教
玉鏡臺前韵事知多少
長相思

怕春殘又春殘
狼藉東風不忍看
傷心下帶難
花可憐人可憐
笑是三生花福全
美人營墓田

憶秦娥

清宵雨聲聲訴出愁情緒
秋情緒挑燈無寐和巴人句
詩成還把殘更數
繁聲一片來無數
來無數琅玕幽韻
會寒蟬語

捲珠簾 悼四女蕙憶次女

午睡剛成愁喚起
半晌無言悶把欄杆倚
死別生離分
兩地羅襟洒徧盈盈淚
刺繡遺綳還在
竒觸目傷心
此恨何時已
最是雨聲燈影裡
思量往事從頭記

壺中天 送織雲歸苒城仍用前韵

排成雁字感卿卿
相待十分情意一水迢迢天樣遠
容易盼
將君至冷落朋儕倉皇心緒歎
立錐無地仙舟去也小樓

從此長閑 多謝為我傳神笑君多事添卻閒情致他
日對花應醉我我已久忘斯世此度相逢較前瘦削略
減眉梢翠丁宜珍重花前霜下吟事

又用前韵會沈瘦生明經

開緘滿紙墨香浮翻出層層新意聽說逢人還說項那
更十分真至誰憐鍾情自誤病到膏肓地五更風雨雙眸
開了重閉 還羨冰雪聰明烟霞品格瘦得秋花致采管
一枝橫掃處別創空明詩世藝苑詞華金閨眉嬾占斷
橫雲翠經綸大才文章猶是餘事

又用前韵送錢師竹文歸雲間

布帆如駛怪西風催動先生歸意紫蟹黃花秋正好
載酒候門人至竹報平安鶴迎杖履三徑壺觴地南窗
寄傲雙扉雖設常閉 卻喜有興看濤偶來海國領畧
高人致更有散花天女降書畫同時行世織雲夫
人同來劍氣如
虹毫花似雪橫掃千峯翠掉頭一笑名山還有多事

又用前韵題黃西堂明經秋容淡照圖

秋光如水借黃花描出淡如人意一卷離騷哦未竟詩
思破空而至老圃烟霞西風簾幙一席名山地人爭載
酒鹿門多恐難閑 看取籬畔披襟風前露頂兩晉才
人致月白霜清花送影認得淵明前世溪色偏幽山光

更淡筆染羅雲翠濟時才大未容長問花事

長相思 贈荀卿夫人

聽芳名憶芳名隔著湘簾看不明琅玕想黛青 佩環
聲誦詩聲最好依花傍月聽聰明要讓卿

如夢令 謝沈吉雲女史贈梅

人是多愁多病天氣雨晴無定折贈一枝春助我幾分
吟興僥倖倖消受暗香疎影

踏莎行 次顧春洲茂才韻

聽雨懷鄉挑燈起草柝聲更和吟聲攪牀頭嘖嘖鼠窺
帷書生膽比狸奴 一卷哦殘八窗送曉春泥滿徑呼

僮掃助愁風雨困人天吟魂依著花枝繞

百字令 病起即事

節過重九負登臨怕見遙峰秋色剛擘雲牋數字病起十
分無力任爾聰明憑他解脫那跳愁城出秋天難曙聽殘
蟲語啾唧 追憶一枕邯鄲黃粱未熟縹緲梯瓊級玉
女瑤姬齊笑我久向紅塵逃匿月引珠宮花招蓬島滿
袖天香襲雞聲驚曉紙窗初放微白

又

舊時明月怪無端變了傷心顏色隔著層兒窗紙薄怎
敵者般風力病骨支離霜花疎瘦淡墨誰描出清宵無

寐背人燈下喂啣 長歎大塊茫茫埋憂無地難覓升
天級天上素娥偏耐冷不放霧籠雲匿水國寒多吳棉
換早尚覺涼颼襲雁聲淒斷一宵催送頭白

清平樂

五更無寐愁得心兒碎惻惻輕寒生綉被坐起披衣還睡
昨宵殘夢匆匆起來尋夢無蹤簾外杏花新放禁他幾陣

東風

又

春光漸老風雨將花掃悼死嗟生懷抱還一味尋煩惱
綠窗燈影小向人明到曉休問未來過去眼前事如

何了

沁園春 題郡伯鄭玉峯先生平戎歌後

五載從戎洗甲歸來回頭廿年向旌旂影卸將繡服虎
狼隊裡重跨征鞍馬首皆西軍書向北冒險先將虛實
窺長驅進把紅江水吸花白苗芟 欣上糧積如山歷多
少崎嶇轉運難艱更壯士傾心驚看磨盾書生投筆偏會
籌邊

天子推心元戎使臂又聽膚功塞上傳

君恩重看一翎孔雀飛上朝冠

踏莎行 題姚行軒山人詞卷

漱玉詞工燦花句好錦囊貯得江山小六朝金粉艷情多
讀殘猶覺餘音裊皓月圓時金英綻早清歌一曲芳尊
倒鹿門花事九秋繁比有人指雙頭笑

前調 題谷巨川文學柳陰垂釣圖

指竹為隣與鷗同性塵寰少此清涼境幽人到此已忘機游
魚底用驚鉤影柳如脩蛾波分青鏡夕陽明滅山光映
奚童還要抱琴來滿溪花夢愁彈醒

如夢令 題扇

砌下幽花方吐蛺蝶蜻蜓對舞掩卻綠紗窗聽徹夢蟲淒
楚如訴如訴更比騷人吟苦

摸魚兒 題榕臯先生桐江秋泛圖卷

蕩輕橈綠楊風軟桐廬山色如繪頻年聽慣吳媛曲輪
與越姬明慧絲管脆鶯得那鴛鴦鷗鷺飛成隊臨波延
佇笑張翰歸來樂天咏去無此好風味新聲倚一埭
齊梁綺靡紅兒歌解人意謝公不為蒼生起逃入水雲
菴裡柔櫓曳聽低語蓬窗落日山橫翠先生醉矣正擁
被微吟披襟露頂一枕黑甜美

柳梢青 題潯陽送客圖

江月空濛荻花蕭瑟隔舫歌聲紅粉飄零青衫憔悴同訴
三生更闌添酒回燈嗚咽處琵琶暫停水國棲遲玉京迢

遞一樣離情

鳳皇臺上憶吹簫 題唐固山刺史髻絲禪榻圖

一片靈機三生慧業竹鑪烟裏微茫柳外殘紅數點飛
上禪床大好文章經濟多半寄茶韵花香放衙早避他
熱惱樂此清涼 江鄉太湖縹緲喜官還似佛髻為民蒼
更手植天桃萬樹管領春光燕寢風恬晝靜蒲團坐忘
清香聽松下沸泉細譜宮商

聲聲慢

柳拖新綠桃放嫣紅南園好片春光憔悴而今看花心
緒茫茫芳踪那堪回首漫贏得無限情傷難消遣自三

生夢斷殘漏難留 又是清明時候望平原古塚易動
愁腸黃土青山高量何處理香濁醪三杯兩盞怎澆得
身世蒼涼春將去送春歸天遠水長

踏莎行 春暮次語花女史韻二闕

鬥草無心問花不語一溪淺碧飄紅雨畫梁雙燕不歸
來閒庭寂寂春將暮 番風似剪濕雲如絮柳絲空裊
愁千縷綠窗排悶倚新聲吟成笑遣雙鬢度
選韵尋詩背燈無語黃昏幾陣催花雨陌頭芳草綠成
茵斷腸回首流光暮 短夢成烟亂愁如絮羅衣黯淡
消金縷燒殘寶鴨掩紅窗三春好景匆匆度

已和

買陂塘 葑山觀荷

問江妃為卿來者賞音千古能幾蘭橈蕩入花深處
先愛撲襟清氣人乍起更難得紅粧新掃眉山翠倩
風扶住看帶露盈盈凌波渺渺宿酒殢殘照凝眸處
花亦消魂無語萍鄉相對延佇橫塘不是仙源路可許
舊游人渡時欲暮漫想到道愁紅怨綠迷烟霧離愁正苦
怕荻岸秋高鷗波夢冷心事共誰訴

步蟾宮 題桐江雪樓閣

桐江花月看來慣忽涌出玉峯天半披蓑人去釣臺空
只柳絮蘆花吹滿衝寒有客吟情淡安放酒瓢茶盞

興酣落筆拓蓬窗差勝騎驢灞岸

壺中天 題湖樓秋思圖

西冷烟景卻廝稱才子風流詞筆寫幅丹青娛逆旅留住
湖山陳跡鏡裡蛾眉隱邊楊柳相對亭亭立樓空人去一樓
春變秋色看取匹練初橫遠峰如沐吹到秋消息湖上
夕陽空翠滿中有騷人吟魄何事淹留不如歸去醉把闌干
拍曰歸歸晚斷腸鷓鴣迎客

水龍吟 題延翠閣主人遺影

萬峯環繞西湖一樓臨水延空翠花明柳暎名姝國士一
雙同倚春夢回頭秋風信杳彩鸞長逝把碧漲三篙落

已和

紅萬點都化作離人淚 留下雲牋密字念征人封成
未寄絮想仙才花傳小影鍾情如此馳驟風雲飄零
劍河陽憔悴倩良工畫了新詩題徧喚芳魂起

百字令 題金瑤岡侍讀百二十本梅花書屋照

江南春早正雲深水濶吹花成霧二十年來薇省夢飛
度冷雲深處沁雪詩腸和羹妙手心事同花訴花應一
要東君作盟主 聞說綠野堂邊梅栽百廿八壽梅花數
月上春山花弄影愛看霓裳人舞香國樓遲名山著述
逸事追千古歸田添了錦囊多少佳句

一斛珠 送春

日
刻

鶯聲漸老慙慙薄醉添煩惱天涯綠徧王孫草蝶倦蜂
慵宛轉春歸早 滿院濃陰人悄悄落紅幾點風前裊
半窻疎雨黃梁覺兒女英雄一樣傷懷抱

前調 送張霞城夫人

送君南浦綠波畫桡留難住惱人更下潇潇雨極目行
雲別淚傾如注 珍重水窗風與露一帆穩上青雲路
承歡子舍娛朝暮此後相思夢裡尋君訴

長相思

紅蓮開白蓮開十五吳姬蕩槳來盈盈紅粉腮 愛花
枝摘花枝更惜花枝下手遲沈吟不語時

鳳皇臺上憶吹簫 次韵俞玉芬夫人

別恨如潮行踪似絮客中生怕逢秋正西風吹鬢垂老
多憂多少鴻泥雪印思放下却又難休更闌後對將
影語背著燈愁 悠悠別來消息看魚牋密字紅暈雙
眸悵舊游似夢雲散風流無限悲懽離合難唱也鶯上

長相思

秋風涼秋夜長落葉蕭蕭亂打窗幽懷暗自傷憶當
初悔當初一棹扁舟泛五湖飄零歸計疎
雞成行鷺成行瘦鶴中宵清唳長霜天夢影涼 朝蕊

香暮愁香頂禮西來大法王天花散道場

五線結同心 和汪籍菴廣文咏繡盒韵

描金寫艷鏤玉鏤瓊美殺文心細小縹緲吟情好分明
是一縷柔絲風裊雕奩縱有新花樣那敢與詞人鬥巧
還生恐情緣易懣綺語消除未了 金針度到顛倒笑
剪綵才疎回文樣少病眼朦朧劇停針處對著昏燈懊
惱添香三復微雲句便依韵賡來草草還歌枕聽殘疎
雨直恁迢迢難曉

大江東去

用東坡韵題舒鐵雲孝廉湘雪吹簫譜

錦囊窄窄盛得下幾許山川雲物久識先生才似海只

是家徒四壁廢院脩蕭荒臺摩笛吹滿瀟湘雪襟懷瀟
洒古來少此人傑 追憶蕊榜初開嫦娥繞識面才華風
發縱使眼中知己少此詞已難磨滅絕塞尋花車門倚
劍吟髻生華髮妝樓寫韻幾回同看圓月

前調 題文山公子養花圖

淡雲微雨正輕寒輕暖宜人天氣公子養花同養士小
試經綸而已曲徑遮風疎林漏日十笏藏嬌地奚奴能
事甕瓶頻貯清水 看取花態玲瓏花情艷逸憑見文
心細錦繡胸藏春一點花亦欣欣如意鈴閣承歡斑衣
樂志藉博親顏喜桂芬蘭馥玉增添種桃李

燭影搖紅 和沈女史菊影元韻

才上銀缸怪來秋夢生羅幌濃於潑墨淡於烟隔著窗
兒望誰替淵明寫像好丰神凌空描樣深閨病起搦管
沈吟先愁難狀 色相茫茫此生久已空情障疎籬映
月最分明一片秋痕蕩隔水伊人宛在倚新聲還勞夢
想瓣香低祝千秋度花開玉人無恙

沁園春 題花簾填詞圖

燕掠簾波蝶沾香雨玲瓏一片春痕想綠窗拓管似笑
疑顰縱有龍眠好手難描他一種丰神知多少雲思花
想絮果蘭因 隨身左圖右史大好湖山錦樣韶春有

六橋花柳消遣良辰漫道金荃漱玉都輸他筆雋詞新
真才是書生不柳中慙傳人

雙紅豆

酒乍醒夢乍醒怕聽空階絡緯聲秋天不肯明 別銀
燈戀銀燈零稿新來漸漸增病餘懶去騰

又

夜悠悠思悠悠漸漸微霜駕瓦浮遙空素月浮 怕秋
來又秋來風物蕭條落木哀愁懷那得開

虞美人 題畫

飛花盡作回風舞仙袂飄飄舉鷓鴣宛轉掌中身恰

好斜陽寫照水傳神 含情無語沈吟又一縷詩情瘦漫
空紅雨正紛紛倩陣好風吹上素羅裙

百字令 龔定菴公子惠題拙集次韻作答

萍蹤巧合感知音得見風前瓊樹為語青青江上柳好
把蘭橈繫住奇氣挈雲清談涼雪懷抱空今古綠深文
字青霞不隔塵土 更羨國士無雙名姝絕世謂吉雲夫人

仙侶劉樊數一面三生真有幸不枉頻年羈旅繡幕論
心玉臺問字料理吾鄉去海東雲起十光五色爭睹時

甫備兵海上公子以親省過吳中

附原作

揚颿十日正天風吹綠江南萬樹遙望靈岩山下
氣識有仙才人住一代詞清十年心折閨閣無前
古蘭霏玉映風神消我塵土 人生才命相妨男
兒女士歷歷俱堪數眼底雲萍纔合處又道傷
心羈旅南國評花西洲弔舊東海趨庭去紅粧白
也逢人誇說親睹

夫人適李有女青蓮之目

賀新涼奉和淑齋師賜題拙集元韵

靈鷲檐前語忽吹來雲璈水瑟鳳歌鸞舞受德還兼知
已感難得般般皆具更祝我金荃名句一種深情似海
是前生夙契今生遇看涉筆都成趣 幽居幸傍龍門
住喜連番程庭立雪評今論古美玉飛瓊諸仙侶題徧
吳綉越紵快賺得珠璣無數十載萍踪歸未晚坐春風
歡喜良辰度清宴啟醴泉養

附原作

天際征鴻語正林園花飛六出隨風掀舞九九光
陰還未半沒个消寒之具但貪看謝家秀句一種
清妍誰得似似疎梅竹外嫣然遇說不盡此中趣
吳門又是經年住對芳時格宮香徑羨番懷古
名媛清閨爭識面結契紛貽縞紵更充拓詩情無
數甚日歸來長聚首把金針朝暮從新度魯酒薄

為君責

金縷曲 奉次淑齋師懷金沙舊居作韻

凍分寒江渡想當年仙舟往返雪掀風阻一曲清商傳
絕唱留下鴻痕無數悵望斷白雲深處雁陣驚寒聲嘹
唳抱離愁夢裡尋歸路心事曲中訴 陽春欲和還
愁誤細揣摹珠光淚點恁般淒楚喬木依然無恙在幾
度迎寒送暑好做个湖山之主衣錦他年營綠野泛蘭
橈仍向金堂住新使節舊桑苧

附原作

風雪吳江渡憶家山無端拋撇勝情消阻舊事思

量重記省浪拍風翻無數又違評萍踪何處月冷
長河闕塞黑愴征鴻迷却沙洲路悲咽事向誰訴
他鄉零落歸期誤酒醒時思量往昔怎禁淒楚
回憶當年棲息地彈指遞經寒暑歎燕子歸來無
主憑仗春宵蝴蝶夢趁東風飛去花間住甚時候

返桑苧

前調 奉次淑齋師湘江夜泊作韻

冷月明湘渚記當年弱齡隨宦曾經游處讀到新詞思
往事愁比亂絲難吐恍吹滿清砧涼杵存沒升沈無限
感訴將來便比後聲苦燒燭短聽殘雨 仙舟小泊雲

深處料無眠。遠窗染翰情深懷。古應有湘靈來竊聽。
滿紙墨花飛舞。正窗外浪翻濤。怒往事追思。渾似夢
倚新聲。倦眼迷烟霧。待買個扁舟去。

附原作

寥潤瀟湘。清向秋宵。停船荒岸。荻花深處。木葉蕭
蕭。涼露落江月一痕。初吐悲此夕。聽殘砧杵。天外
征鴻聲不斷。聽聲聲似訴離鄉。苦人不寐。淚如雨。
二妃魂魄。知何處。道湘筠斑斑。淚點于今如故。屈
子英靈。應尚在。徹夜魚龍飛舞。試聽取風濤。掀
怒往事。蒼涼誰弔。問剝商船。玉笛吹烟霧。天欲

曉解維去

前調 奉次淑齋師月夜聞笛作韻

韻繞韻繞。樓高處是誰家。夜涼人靜。調宮按羽。天上瑤
姬仙夢。破喚起新愁。無數更似水月華。當戶記向露
桃花下。坐和鸞笙。有个飛瓊侶。聽金箭。綠蘭炷。羅
衣太薄。愁風露。最淒涼。寒蟄金井。伴人羈旅。此味年來
嘗已徧。話到同心倍。沈味妙咏冰壺玉。筋窗外雨聲鈴
索響。更消魂。愁絕難成句。歌郢曲。遣誰譜。

附原作

幽韻來何處。聽隨風。淒淒調發。移宮換羽。正是二

分明月夜散落梅花無數暗飄入碧窗朱戶折柳
心情渾莫辨對銀缸獨自懷傳侶掩珠箔消香炷
花陰寂寂生涼露到秋來鳴蛩淒切易傷羈旅
況是離人吹怨思引得愁腸更苦更難禁雙垂玉
筍側側霜寒衣袖薄倚樓人卻憶消魂由待閒暇
記宮譜

前調 次圭齋妹韻

月冷蟲喧砌悵懷人天末一庭秋氣粉黛留題頻展玩
生把離魂喚起感知音一片標題意翹首妝臺天樣遠
抱沈疴筆硯經時廢幾覲面夢兒裡 遙知霧閣雲
窗際吮毫尖紅絲研小衍波牋膩最羨謝庭多樂事更
難得有才如此嗟我頻年漂泊久和新詞草草慚材菲
權當作雙魚致

附原作

密雲吹苔砌正黃梅時候困入天氣才見斜陽明
竹外天半愁雲又起便房櫳側側生涼意撩亂心
情渾不定把常時鍼線都拋廢但默坐碧窗裡
懸知畫閣薰爐際捲疎簾山榴火綻庭萱烟膩即
物總應清興發引出詩情琴思問若个雅懷如此
聲譽流傳吳越徧廁門牆自覺慙葑菲借霜管

寫高致

清平樂 聽雨次圭齋妹韻

夕陽西下月向簷前挂香霏空濛花夢惹此景宜詩宜
畫輕寒一縷穿寮夜深沈水添燒樺燭金尊昨夜昏
燈冷雨今宵

琉璃窗下別去心常挂最怕雨絲風片惹一段離愁細
畫生憎燕子窺寮春寒歎炭還燒架上殘書幾卷消
磨白晝清宵

附原作

水晶簾下新月娟娟挂料峭柳條風暗惹花影一

庭如畫 微風寒透窗寮畫屏銀燭高烧寄語

海棠休睡莫教負此良宵

金縷曲 新涼呈淑齋師

海國秋生早向晚來瀟瀟疎雨濛濛斜照不耐羅衣涼
似水彈指中元過了添一種悲秋懷抱往事淒涼頻入夢
回時徹夜蟲聲鬧燈燄小紙窗曉 愁來窗下翻殘稿
感知音般般憐惜同心同調天半龍門高許入也笑三
生脩到想到此間愁都掃準備花前睽雅集笑良辰只
有中秋好金縷奏玉樽倒

沁園春 題雙梅索笑圖

第一番風早返冰魂未減峭寒訝紅紅白白珠珠翠翠
臨風索笑照影爭妍艷比朝霞清同白雪贏得東君著
意憐間相約向柔床簫局分韻題牋 花前姊妹齊肩
是誰倩龍眠妙手傳愛清眸剪水脩蛾妬月十分韻致
一樣纏綿白傅風流王郎才調相伴同參花底禪柔鄉
好向水雲深處築个芳園

柳梢青 題曼雲女士照

曲院風柔韶華似錦垂柳陰稠玉骨生香蛾眉擅秀花
見還羞 羨他道韞風流拈花笑尋詩興幽大好園林
待儂病起來共卿游

浪淘沙 題紅牆一角卷子

銀漢月微茫風露新涼家家砧杵夜偏長悵望碧空烟
靄裡一角紅牆 幽夢涉河梁彷彿仙鄉步虛何處問
宮商依約似花還似霧仔細思量

摸魚兒 題許五年孝廉孤山補梅圖即次其韻

驀吹來過雲高唱喚回當日和靖山空鶴去梅花瘦一
縷吟魂孤冷誰更把玉骨冰魂雪爪從頭認何人繫艇
喜有个知音補梅招鶴傳出後身影 嗟身世我亦萍
蹤靡定到來塵勞初醒風廊水榭分明現記尚有漆園堪

證

平生常夢至一所石欄四亘仙鶴翩跹而後徧歷名園未嘗覩此後至孤山適符夢境曾有紀事詩數章

始知人生游歷
亦有前緣也

貪夕凭把尚恍情懷細訴梅花聽斜陽
半嶺有百種低徊絕無人語雙鶴自相應

壺中天

乙酉仲夏曹柳橋先生自杭來上枉顧敬齋氣度
端凝才思超越心甚故服外子以一館羈身儀亦
經時衰病兼日向平之累每有庚癸之呼未能稍
申地主之誼先生憫其衰頹轉以家藏古鏡見貽
意良厚矣第思神物必歸巨手未敢奩中私匿因
填此闋以歸之用誌不忘即請願悞

秦時明月訝無端一翼飛來粧閣不獨照人肝胆一片古
光流灼貴比商彝珍于周鼎不費人工琢殷勤持贈感
君嘉貺優渥還念異代流傳如斯神物敢向奩間拓
早送明珠歸合浦免似龍津騰躍才子文章偉人手筆
廝守團圓樂扁舟江上影形相伴離索

滿江紅

五年孝廉自京中遙寄新詞次韻作會

吐氣如虹人世事付之一笑儘吟徧聖湖明月燕臺芳
草刺有奚童供硯席更無紅袖司茶竈勸多情莫住
有情天天還老才子氣難除傲騷人癖偏工嘯正風
雲馳驟歸期還早他日恩深容乞假堂開畫錦湖山
繞且從容倚劔上金臺韶光好

莽莽乾坤問今古幾人稱意笑脩到真靈位業神仙境
地作賦定煩才子筆點金也乏仙人技只眼前一樣好
湖山鄉風異 琴須對知音理鵬好待長風起縱遠山
眉黛伴他滌器壯士高歌聊當泣才人妙語難除綺藉
冰霜釀出好韶華君知未

前調 聽雨用前韻

到眼春光還怕見柳顰花笑空贏得情懷惘惘浮生草
草風雨飄蕭蝸上壁蘊鹽冷淡塵封竈向亂書篋裡度
年華人空老 浮雲態從人傲紙窗破日風嘯怪雞聲
無賴鷺眠太早曉夢半隨飛絮亂愁紛若春蠶繞

只眼前事事欠安排如何好

沁園春 題媚川妹湖石尋詩圖

悄坐湖山換了春衣可耐峭寒正蕉心細剝蠶絲乍引
輕拈彩管漫試螺丸逸興遄飛吟情綿綉都在眉梢眼
角邊沈吟久喜神游象外白落天邊 纏綿玉潤羨一種
清才賦自天想聖湖水碧申江浪暖時紫清夢多付紅
牋蹟面詞工望雲心切白好還憑雁足傳詩成後儘秦
嘉細讀疊和新篇

壺中天 簡寄龔蓉淑丈

客秋言別數流光過了試燈時節極目蒼茫雲海濶萬

頃洪濤堆雪東閣壺觴西園桃李人境雙清絕瑤英能
事一卮春酒親設更喜冰署長閒寶貓無恙吟瘦梅
花月咏絮人來趨絳帳離合悲歡重說學倚新聲恭
脩短扎為感閱情切草堂如舊一寒還甚當日

前調 陶雲汀中丞枉賜詩序呈謝

杏花枝上忽聲聲鶻喜連朝勤報聽說星輅臨海國
恰值鳥歌花笑芳徑留題高樓潑墨到處留鴻爪吳
淞江畔又聽輿誦聲好自念飲露寒蟬經霜弱草分
得蒸光照敢比三都增紙價也許青雲附到露盟香薰
紗籠錦襲珍過連城寶佛鐙影裡祝公富貴壽考

哀宗支派久凋零珍重荷公拂拭省識千秋靈氣在文
字因緣種得祠館荒涼墓門蕭瑟風雨過寒食

序中言及

安亭震昔年堂上記曾刊取遺墨

先君自山左歸田曾刊震川大全集長

念賦命如雲行踪類絮提甕還無力昨史研經才苦短
敢廁師儒一席深感龍門寬量玉尺几硯生顏色護根
憐葉一門同受恩澤

前調 奉題雲汀中丞皖城大觀圖照

畫師妙手染丹青留住皖公山色最喜江山佳絕處天
與偉人一席拄笏看山臨風懷古揮洒如椽筆萬家
烟火混茫帆影如織還上百尺高樓孤亭獨峙放眼

乾坤闢滾滾長江流不盡多少英雄陳迹山帶鄖陽水
流白下吳楚東南圻五年宦轍有人珍重刊壁

沁園春 奉題雲汀中丞采石登樓圖照

奇秀江山到此登臨代有逸才向片石摩挲仰天問月
高樓延佇對景興懷謝李文章范韓事業行部江村
幾度來憐才意拜千祠墓一翦蒿萊 蒼崖挂滿松釵
頻拂拭烟霞生面開想采石磯邊雲帆屢卸翠螺峰
頂筆陣長排對月揮毫臨風釀酒手摘星辰實壯哉
元暉去剩澄江如練浩浩無涯

前調 呈芝楣先生

憶昨公來節過天中碧沼放蓮向春申浦口課農行水
橫雲山外運海籌邊住本瀟湘來從雲夢屈宋才名
早豔傳風華甚羨髮簪紅杏人正青年 前緣幸遇
神仙更難得胸涵湖海寬感春風吹處茅檐送暖廉
泉分到冷竈生煙病眼茫茫吟聲細細神在虛無縹緲
間何脩到喜焦桐遇賞青眼垂憐

金縷曲

芝楣先生賜示金縷曲九闋皆題張雲裳女士紅
白梅花橫卷作也次韻作謝

仙露娟娟墮訝芳蘭亭亭馥馥十幅烏絲三尺絹不改

政餘清課儘藝苑諸公虛左行部江村停畫舫伴閒鷗
一夕親漁火談逸事濺珠唾 蘆花岸側明燈坐聽瑤宮
神僊伴侶風揚月播清角調高傳絕唱雁叫蓬窗月過
詩世界纖塵難浣國士逸情天女格是劉公道韞才方
可歌郢曲有誰和

前調 用前韻送芝楣先生返任蘓臺

鷺見天花墮繡床前五光十色飛來萬朵不改書生當年
面詞翰文章日課大手筆前臨班左怕聽仙舟侵晨發怪
催人潮信如星火還擲筆墨花唾 半宵擁著衾兒坐
聽簷前簌簌錦馬露搖風播太息瞻韓空留願錦樣
韶華病過襟袖上淚痕霑澆重盼星輅來申浦捧芸編
問字經帷還待把錦牋和

前調 寄文山夫人都中

遙夜思君切正江南綠肥紅瘦斷腸時節燕樹吳雲
添惆悵彈指多年隔別况道遠音書寥闊堂北佛驚萱花
謝引金刀臂濺淋漓血聞信下倍淒絕 當時畫閣親顏色
快追隨神仙伴侶良風重過轅門聽官鼓怕見瀉泥舊
迹更老病僅存難骨盼殺萍踪重相聚炷心香長禱
西天佛勤愛護莫輕忽

前調 卷子

三用前韻為芝楣先生題雲裳女士梅花

雪裡朝霞墮怎玲瓏胭脂萬點染來成朵聽說玉臺嬌
吟咏添了花工月課訝放徧水南山左春暖羅浮人倚
醉怪冷香偏綻星星火還對著繡絨唾 有人東閣橫
琴坐聽忽傳來鶯鶯谿一幅韵流香播笑把冰魂生喚
起不放韶春輕過莫只認粉痕脂澆當代廣平推賦手
置高齋相對圖書可金石調唱還和

前調 四用前韵寄呈芝楣先生

清淚無端墮乍凝眸瓶中芍藥又開幾朵紅雨樓頭新
綠滿完了三春花課剩雪爪猶留座左月榭風廊人寂
寂好良宵冷落閒燈火誰繼燦花唾 掩窗倚枕連朝

坐聽風前金鈴自語翠翻紅播珍重霞牋貽秀句排悶
長吟數過肯輕放香奩脂澆細向新篇參妙諦療_青首
當作金丹可天半鶴飛來和